

東  
華  
續  
錄

光緒一百五十七

臣朱壽朋敬編

臣沈彭年恭校

十一月內午以傳與那桐爲內閣學士○丁未諭裕祿奏遵派道員吳廷斌勘明永定河全河形勢妥籌辦理一摺永定河下壩上淤變遷無定以致沿河受患日深經裕祿督飭吳廷斌周歷查勘情形所擬施工修治各法尙屬切實妥協著照所議辦理所需經費著戶部按年籌撥卽責成裕祿遵派熟悉河工人員常川駐工次第興辦務期一勞永逸以副朝廷保衛民生之至意○戊申諭毓賢著來京陛見山東巡撫著袁世凱署理卽行來京請訓○己酉以楊鴻禔爲山西太原鎮總兵○癸丑松壽奏准軍機大臣字寄光緒二十五年七月二十六日奉 上諭有人奏江西漕糧加價請展限期並嚴禁糧差墊納以蘇民困一摺據稱江西漕糧向係九月開徵按一月爲限逾限照章加價該省晚稻必至十月成熟九月尙無米穀可售民間無錢完納漕米糧差墊納勒索數倍小民不堪魚肉請飭變通舊章展限一月等語著督同糧道體察情形妥定章程奏明辦理其糧差墊納勒索情弊卽行一體嚴禁以恤民隱等因欽此○查江西漕糧原於同治四年定爲三限徵收以九月爲初限十月爲二限十一月以後爲三限二限每

石加價銀五錢三限以後每石加價銀一兩迨至同治七年部議改爲二三兩限每石加價銀三錢同治十三年又改爲仿照江蘇辦法年外完漕每石加價錢五百文光緒十一年六月內前撫臣德馨因江西丁漕欠數過鉅漕糧加價限寬民多因循拖欠設法整頓請規復三限變通加價初限一月不加二限加錢三百文三限加錢五百文奏奉 諭旨江西丁漕積疲已極據奏清查糧戶變通三限各節著即督飭所屬認真整頓實力奉行等因欽此欽遵在案卽經恭錄轉行通飭嚴禁糧差墊納勒索一面督同糧道藩司詳加體察漕糧自規復三限以來輸將稍見踴躍民戶相安已久今原奏內稱江西田土性晚必至十月始能成熟等語伏查江西民間耕種有早晚兩禾之分播種早稻者十居其六栽插晚禾者十居其四並非一律栽種晚稻是以向定限期有九月十月開徵之別近年庫儲支絀需餉孔殷向來十月應解漕折四批趕於年前到部兌收若不論收成遲早概展一月不惟致花戶觀望之心亦且京餉必致延誤臣查白漕各屬收成較早者如南昌新建高安新昌清江廬陵吉水泰和萬安蓮花臨川金谿東鄉南城新城上饒玉山廣豐鉛山弋陽貴谿興安鄱陽樂平浮梁德興萬年都昌等二十八縣縣擬請仍以九月開徵爲初限十月爲二限十一月以後爲三限其收成較遲者如鹽城進賢義甯武甯奉新靖安上高新喻新淦峽永豐安福龍泉永新崇仁南豐餘干安仁建昌安義等二十州縣擬請准展一月仍以十月開

徵爲初限十一月爲二限十二月爲三限至逾限加價均仍照光緒十一年定章辦理以收成之遲早定開徵之先後於民間既無所妨於京餉亦不至遲誤庶幾官民兩便至於糧差墊納勒索本病民久經飭屬嚴禁現復重申禁令並隨時認真查察倘敢陽奉陰違立即行提究懲並將該管州縣分別撤參以恤民隱據督糧道李岷琛布政使張紹華會詳請奏前來除咨戶部外理合恭摺覆陳下戶部知之○甲寅大祀 天於 闕丘遣載勛恭代行禮○乙卯出使美日秘大臣伍廷芳與駐美墨西哥使臣阿斯比羅斯在華盛頓議訂和好通商條約二十款成其文曰 大清國 大皇帝大墨西哥國大伯理爾大德欲兩國及其人民敦友睦之誼公訂和好通商行船條約是以 大清國 大皇帝特派 欽差出使美日秘國大臣二品銜四品卿銜伍廷芳大墨西哥國大伯理爾大德特派欽差頭等出使美國大臣阿斯比羅斯爲全權大臣各將所奏議約之據公同校閱均屬妥善現將議定條款開列於左 第一款 嗣後 大清國大墨西哥國兩國人民永敦友誼堅固締結彼此皆可任便前往僑居其身體家屬財產皆全獲保護與相待最優之國人民同獲恩施權利 第二款 嗣後 大清國 大皇帝可派使臣駐劄墨西哥國大墨西哥國大伯理爾大德亦可派使臣駐劄中國京都以便往還通好各准兩國使臣並眷屬隨員人等前往彼此京都或常川居住或隨時往來兩國使臣在駐紮之國得享權利優例恩施及

應得豁免利益均與相待最優之國同等使臣無異 第三款 兩國於彼此通商口岸可設立總領事

領事副領事並代理領事等官惟此等官員必須奉到駐劄之國認准文憑方得視事交發此項文憑均

不收費於未設領事官之各口可請友邦領事兼代如無領事之處由地方官照現定條約使兩國人民

享種種恩施其領事官應得分位職權豁免利益及優例均與相待最優之國領事官無異至商民交

涉事件有與地方官民齟齬者領事官均不得任意爭執如領事官辦事不合違背地方條例彼此均可

將認准文憑收回 第四款 中國人民在墨西哥國如安本分不違墨西哥律例章程無論何處任便游

歷墨西哥人民亦准前往中國內地游歷惟須由領事官照會關道請領執照方可前往此項執照填寫申

題兩國文字所過地方如飭交出執照即應隨時呈驗回日繳銷該人民僱人僱船僱車裝運行李不得

攔阻如其照內有誤或查出沿途有不法情事即送交就近墨西哥領事或墨西哥委令兼理之友邦領事查

辦沿途只可拘禁不得凌虐如在通商各口出外游玩者地在百里之中期在五日之前可以毋庸請照

至於船上諸色人等不在此例如有上岸應照地方官會同領事所定章程遵守辦理 第五款 兩國

允准嗣後彼此人民出洋無論單身或攜眷屬皆須出於情甘自願不准或在中國各口或在他處妄用

勉強之法或施詭譎之計誘令中國人民不出情願而往如有兩國人民或船隻違背此約則兩國必從

嚴究辦均照本國律例從重擬定罪名 第六款 中國人民准赴墨國各處地方往來運貨貿易與別國人民一律無異墨國人民准赴別國人民所至之中國通商口岸往來運貨貿易嗣後兩國如有給與他國利益之處係出於甘讓立有互相酬報專條者彼此均須將互相酬報之專條一體遵守或互訂專章方准同滿所給他國之利益 第七款 兩國人民及商船凡在此國通商口岸即應遵此國與各國現在合例通行商務章程或日後續議新章一律辦理 第八款 中國土產及製造各物運入墨國或墨國土產及製造各物運入中國彼此徵進口稅不得較相待最優之國之同樣物產現在或將來所徵之稅稍有區別或有加增各物出口徵稅亦照此辦理兩國彼此通商若非通商各別國一律照辦無論進口出口貨物不得稍有禁止或立限制惟國中遇有辦理人畜疫禁或隄防損害豐收或為軍務起見則不在此例 第九款 兩國兵船准赴別國兵船所至口岸彼此接待與相待最優之國無異購買食物煙煤甜水以及行船必需之件修理船隻各聽其便該兵船進口出口一切稅鈔概不輸納墨國兵船管駕官中國地方大官與之平行相待 第十款 此國人民寓居彼國境內不得勒令充當水師陸師義勇等役亦不得勒令出資捐免亦不得以軍需等名目勒借強派惟遇有按產抽捐之事此國人民在彼國擁有產業則照彼國人民一律辦理所有船隻器具各項貨物以及家用什物均不得強令捐出以

供軍務等用須先訂價議妥方可 第十一款 兩國商船准在彼此現在或將來開准通商各口與外洋往來貿易但不准在一國之內各口岸往來載貨貿易蓋於本國之地往返各口運貨乃本國子民獨享之利也如此國將此例施於別國則彼國商民自應一律均沾但須妥立互相酬報專條方可照行此國商船出入灣泊彼國各口其應輸關稅船鈔燈樓入口帶水疫藥救生救貨以及國家地方抽收各費不得較抽別國船隻稍有殊異或有加增此次立約所言各口即指現在及將來准設貨物進出通商之口岸彼此均以海岸去地三力克每力克合中國十里為水界以退潮時為準界內由本國將稅關章程切實施行並設法巡緝以杜走私漏稅兩國船隻遇有大災在彼此沿海地方收口者該處官員須設法相助所有未遭失險之貨物如不出售准免納稅此項遇險船隻均與別國遇險船隻一律相待 第十二款 此國人民訂立合同在彼國承工不論田寮機器廠行店住宅等處應遵照兩國妥定章程辦理 第十三款 墨國人民在中國遇有控告華民事件須先稟墨國領事查明根由先行勸息使不成訟中國人民有赴墨國領事控告墨國人民在中國者墨國領事亦應一體勸息倘有不能勸息者無論原告或係華民或係墨民皆專由被告所屬之官員公平訊斷 第十四款 中國人民有被墨國人民在中國欺凌擾害墨國官依照墨國法律拿獲懲辦墨國人民在中國有被中國人民欺凌擾害地方官亦

依照中國法律拿獲懲辦總之兩國人民在中國遇有交涉財產犯罪各案俱由被告所屬之官員專行審斷各照本國法律定罪惟通欠案件應由欠戶所屬之官員勉力設法使其償還竊盜棍騙案件應照被告所隸之國法律辦理兩國官員均不能代償至中國人民在中國遇有本身犯案或牽涉被控凡在墨國人房屋行棧及商船隱匿者由地方官知照領事官會同派差拘拿不得庇縱稍留 第十五款  
墨國人民在中國有自相控告案件不論人產皆歸墨國官審辦倘與別國人民有事在中國涉訟應由墨國官員與該國官員辦理以上案內如牽涉中國人民仍應按照前兩款辦理若將來中國與各國另行議立中外交涉公律以治僑居中國之外國人民墨國亦應照辦 第十六款 凡此國船隻駛至彼國通商口岸該船諸色人等如有上岸在二十四點鐘內滋事者應由的當地方官懲辦只照該口常例罰鍰或監禁至墨國船隻在中國水界之內有與中國船隻相碰互控情事可由被告所屬之官員查照各國現行碰船章程審理倘未甘服應聽原告所屬之官員照會審理之員秉公覆訊核斷了結 第十七款 中國人民在墨國有控告事件聽其至審院控告應得權利恩施與墨國人民或與相待最優之國人民無異 第十八款 此次所定條約係用中國文墨國文英國文在本國各用本國文字如有不符應以英文為主 第十九款 此次議定條約彼此恪守自互換之日起至滿十年為期若於款內有



欲行變通之處應俟計至期滿之日先期六箇月彼此備文知照若未先期知照仍應照此次議定條約辦理倘欲停止此約必須預先知照惟自知照之日起仍須照行一年 第二十款 此次所定條約由兩國 批准後即在美國華盛頓京都迅速互換 此約在美國華盛頓繕寫漢文墨文英文各二分由兩國全權大臣署名蓋印以昭信守○丙辰譚鍾麟等奏廣東籌辦團練保甲事宜 臣鍾麟於上年十一月奏奉 硃批即著飭屬認真舉辦毋得徒託空言欽此嗣復欽奉 寄諭各省舉辦團練將辦理實在情形隨時具奏以慰廬系等因仰見 朝廷除暴安良之至意當即欽遵懃懃印委各員切實辦理續派署高州鎮總兵潘源記名提督孫國戰總兵黃金福等分赴各屬示以訓練之法築營之式嗣據各印委陸續稟復先清保甲次辦聯團於壯丁內挑練統計六十八州縣挑壯丁六十五萬六千餘人姑練八萬八千一百餘人蓋練則需費州縣瘠苦者多經費難籌故所練有多寡舉辦有先後也高州之茂名等縣向有規模籌辦最爲得法實藉紳士之力本年三月陸續土匪滋事糾衆千餘攻撲縣城經知縣將星熙集團勇擊散殺四十餘名此辦理早著有成效者也他如三水等二十餘縣因經費未籌集團丁而不能練臣鍾麟復另擬簡便之法一縣中分設東西南北中五局中局設於城內每局先練十人爲什長大縣每局三四十人每什長各擇九人自行訓練有警一呼即至按名給餉什長各率九人往捕可得百人之

用匪多則合二三局什長圖之法簡費省行之瘠苦州縣尤爲相宜已經通飭照辦並令各該管道府親赴各屬查點校閱庶得力與否一目了然不致有名無實所需軍火已奏撥滙局來復鎗五千枝勻給應用又電商德國使臣呂海寰代購毛瑟鎗一萬枝運粵分飭繳價給領仍由地方官烙號稽查粵東盜匪皆有洋鎗既設團練不得不授以利器也省城設有團練總局而南海番禺兩首邑紳士意見參差尙無頭緒緣自好者不願與聞嗜利者趨之若鶩又不足取信於人故迄無成效至滙海各屬漁團亦據陸續稟報遵行其非漁船聚集之處卽免辦以省擾累得 旨知道了仍著分飭各屬實力舉辦毋得始勤終怠○貴州提督羅孝連卒賜卹如提督軍營病故例戰功事蹟宜付國史館立傳並准於原籍及立功省分建祠○以梅東益爲貴州提督○辛酉諭譚鍾麟著迅速來京陛見兩廣總督譚李鴻章署理未到任以前著德壽暫署○以林紹年爲貴州按察使○壬戌諭世道人心之患莫患於是非順逆之不明是以古聖賢有僞辯之誅有橫議之戒爲其惑世誣民也朕自沖齡入承大統篤荷 皇太后恩勸教育垂三十年自親政以來時事艱難益甚朕宵旰焦思恐負 慈闈付託之重願 歷聖神武之謨稍冀得人以資振作而翁同龢極薦康有爲並有其才勝臣百倍之語孰知康有爲密布邪黨陰搆逆謀幾陷朕躬於不孝並有祇保中國不保大清之說遂有改君主爲民主之計經朕覺察諄請 聖慈訓政乃得轉危爲

安而康有爲及其死黨梁啟超先已遁逃稽誅海外猶復肆爲鼓吹布流言其意在蒙惑衆聽離間宮廷迫譚鍾麟查抄康逆等往來信函有譚嗣同堪備伯理璽之選是種種逆跡殊堪髮指凡我中外臣民知其狂悖者固多而受其欺惑者千百中不無一二不但不察是非兼亦不明順逆所當相戒而明示者也自去秋訓政以來上下一心官府一體勤求治理絕無異同而康逆等猶怙爲維新守舊之論煽惑狂躁喜事之徒殊不知我朝聖聖相承祖法昭垂永宜遵守且朕躬臨治之意但孜孜於富國強兵爲急今慈聖垂訓之言仍諄諄以修政交鄰爲急爰特明申誥誡披示朕心凡我臣民勿得輕聽流言妄爲揣測倘再構煽邪說羣相附和去順效逆邦有常刑至康有爲梁啟超大逆不道漏網吞舟果使稽誅是無天日近聞該逆狠心未改仍在沿海一帶倏來倏往著海疆各督撫懷遵前諭懸賞購緝無論紳商士民有能將康有爲梁啟超嚴密緝拿到案者定必加以破格之賞務使逆徒明正典刑以申國憲卽使實難生獲但能設法致死確有證據亦必從優給賞總之邪說雖煽而忠臣孝子必不忍聞憲典雖寬而亂臣賊子必不能貸將此通諭知之○癸亥馬相如以病免以馮光道爲陝西布政使○浙江提督陳濟清卒賜卹如例○丙寅諭劉坤一著來京陛見兩江總督著鹿傳霖署理江蘇巡撫著陸元鼎暫行護理○戊辰大學士吏部尚書孫家鼐以病免○戊辰鄧華熙奏准軍機大臣字寄光緒二十五年

五月十六日奉 上諭剛毅奏長江防務緊要水師兵單不敷分布請飭沿江五省督撫不分畛域節節設防以期首尾相應等語長江江面遼闊港汊紛歧現值多事之秋亟宜加意嚴防以杜窺伺著劉坤一張之洞德壽鄧華熙松壽于陸霖俞廉三會同妥商各派得力將領扼要駐紮嚴密設防該督撫等務當不分畛域聯絡一氣庶幾緩急可恃仍將籌商布置情形先行具奏等因欽此仰見 聖主軫念江圻備豫不虞之至意 肅應重寄欽懷實深當即分咨兩江湖廣江蘇江西湖北湖南各督撫並商量布置一面詳察安徽境內河江形勢水陸兵數熟籌整備之方冀盡防維之力旋准兩江總督臣劉坤一咨長江防務自以下游爲重吳淞鎮江江陰江甯等處要隘業經層層布置聯絡聲援尙足以資戰守萬一有事上游各省某省實能派定某軍人數若干駐紮何處以備有警咨調東下接應咨請酌覈具覆等因臣查長江水程由蘇省而達皖境南岸起自當塗縣至東流縣止北岸起自和州至宿松縣止延袤七百餘里所最重者在於邊界大門分置陸師水軍交相固守皖境下游要害曰東西梁山夾江對峙兩山巔巔口門狹窄鈴東江流實佔天然之形勢而扼江路之咽喉東梁山在當塗縣境建有石城礮臺西梁山在和州境亦建有礮臺營壘其上游曰攔江磯在懷寧縣境曰前江口在貴池縣境南北斜對自成犄角之勢各建有礮臺撥營駐守再上安慶省城東門外江心起洲路狹溜急建有礮營均屬位置得宜堪資守禦

惟水陸兵勇則以餉需竭蹶屢經裁減存數無多現時專顧江防營隊副將趙金凱所統精健三營前營分駐東西梁山左營分駐攔江磯前江口右營駐無湖通商口岸距東梁山四十五里聲息相聞提督韓大武所統改習洋操之練軍定安等營內礮勇一營駐省中營副營及長慶勇營分駐省城內外逐日勤操臣不時校閱鼓勵兵心演習純熟何處應行分撥均可隨時應調以上陸軍共二千九百名又澄江營水師礮船二十五隻水勇三百二十七名分防省城攔江磯無湖等處僅足巡查港汊防範匪徒賴長江水師提標中營無湖裕溪大通安慶蕪陽等營在皖境沿江兩岸自下而上逐節設防相爲維繫此時思患豫防自宜出以鎮靜臣嚴飭各營實力實心精求操練嚴守機宜無事常如有事之備此安徽江界本來駐軍設備現飭加意嚴防之情形也皖北鳳泗等屬接壤蘇豫爲盜匪出沒之區現有練軍二營防勇勝威靖馬步等營共二千九百八十名分紮巡防可資兼顧皖南伴練軍二營步隊七百名馬隊五十六名分防甯廣一帶萬一江防喫重下游甯鎮等處必須皖省撥隊以助聲威在皖北各軍相隔既遠防地亦關緊要其勢未可動移惟有駐省練軍防勇及皖南練軍就近酌撥前往策應長江水師戰艦亦可由提臣酌調下駛以壯聲威但念一經抽動原防卽屬空虛況江安軍輔相依情形重於湘鄂等省皖境第一重門戶在於東西梁山平時有精健勇丁三百名分營礮臺不嫌其少有事則必多添兵隊水陸防維

恭繹 諭旨節節設防扼要駐紮之意以皖中兵力單薄不勝顧彼失此之虞臣雖已咨上游各省疆臣  
請派珍域急則分兵協防聯絡一氣而皖自爲計仍應妥籌的餉添練精兵是以臣有援案加收鹽價以  
資接濟之請仰蒙 俞允正在籌議開辦俟查明通年收數約有若干卽當量添勇營訓練精勁以備緩  
急徵調且念軍營守禦利器爲先新式之巨礮快鎗皖省尤爲缺乏並當酌量添置以實軍儲另由臣奏  
明辦理倘或甯蘇有事須能往援可分久練之師接應前敵而飭新募之隊力扼中樞此籌備增兵購械  
固圍而協助鄰封之情形也臣維長江數千里必須扼要嚴防門戶固而堂奧乃安兵備嚴而敵情自沮  
臣省大江中以地居上下之交餉絀兵單甚於各省惟有隨時策畫圖補艱難防患未然勉殫心力嚴督  
各營將領激勵壯心各使操防盡力並與各省疆臣會商軍機求聲氣之相通以期疆圉又安仰副 朝  
廷整頓軍備之意得 旨覽奏已悉臣等隨時加意嚴防並會商上下游各督撫聯絡一氣以備緩急勿  
稍弛懈○己巳以王文韶爲協辦大學士○以趙舒翹兼管順天府府尹○以徐卨爲吏部尚書徐用儀  
爲兵部尚書徐會澧爲都察院左都御史○庚午以許景澄爲吏部左侍郎陳學棻爲吏部右侍郎吳廷  
芬爲戶部右侍郎○辛未諭御史劉學謙奏直隸州縣捕務廢弛請飭整頓一摺直隸各屬盜風甚熾疊  
經有人奏參若如所奏各屬盜風甚多州縣職鹽不辦捕役得賄包庇似此捕務廢弛日後一日尙復成

何事體著裕祿按照所參各節確切查明地方官如有謀盜情事卽行嚴參懲辦並通飭各屬州縣官上緊整頓捕務以靖地方

十二月甲戌朔諭現在朕躬尚未痊愈所有年內暨明年正月應行升殿及一切筵宴均著停止○乙亥諭近因朕躬尚未痊愈所有 壇 廟大祀均經道員恭代明年元旦應恭詣 皇太后前叩賀荷蒙

聖慈以天氣嚴寒曲加體恤自應仰體 慈懷明年正月初一日朕恭詣 寧壽宮在 皇太后前行禮

王公百官均著於皇極門外行禮至升殿及一切筵宴業已降旨停止是日朕仍御乾清宮受賀○丙子熙麟奏吏部則例考績內載每遇舉行京察之期各部院堂官務選賢能不得以劣員充數如有濫保一經查出卽將該堂官照濫保匪人例降二級調用又嘉慶五年十一月十八日奉 特諭三載考績始自

唐虞至今日則爲京察用人之典至要而選士之方必慎氣節未有阿諛諂媚之徒而能有廉明之政者也近年以來六部堂官所拔識之司員大率以迎合己意者爲曉事之人以執稿割辯者爲不曉事之輩以每日儆諷卑詞巧捷者爲勤慎以在司坐辦口齒未訥者爲迂拙遂至趨承卑鄙乞憐昏夜白晝驕人仕路頹風幾不可問氣節銷磨殆盡成何政體耶近日堂司各官雖比前稍加檢束奔競之風恐未能盡改總由積習相沿在淵難返朕思轉移風氣之方須立矜式觀摩之準現已將屆京察之期各部俱應保

薦取資格較久謹厚樸實之員其少年澆薄才華發越者應俟其經練下屆再行保列等因欽此 聖  
訓昭示來茲嚴罰著爲定例固已至爲詳盡至爲嚴明而每屆京察所保薦終未能力抑才華發越者而  
寧取謹厚樸實之員以故既膺保薦復被參革者亦時有而因以追論原保大臣如例議處者亦不概  
見以少年才華發越每易爲人推許雖或誤保人亦多由原之也顧恭讀 聖訓正以每易爲人推許使  
不能俟其經練則發越卽澆薄之由一經誤保雖與原保者以重罰而少年之僨事或已敗壞而不可救  
止惟謹厚樸實之員初用之不必有所見長久任之終可不失故步而乞憐昏夜白晝驕人尤老成木訥  
者所不能爲而少年巧捷者之所優爲阿諛諂媚氣節銷磨端在此輩故 聖訓煌煌卽以寧取謹厚樸  
實之員爲萬世 特示保薦矜式之準而既奉 特諭且俾懸之公署觸目警心斯不能悞違卽法益無  
可遁耳竊見近數十年來 朝廷簡擢大臣雖 恩寵迭加而資格猶不憚三致意焉蓋慎之又慎也乃  
自甲午後士大夫爭以才華發越互相標榜而少年澆薄之徒言論風生遂顯以逞其白晝驕人之態卽  
陰以濟其乞憐昏夜之行馴至風會所趨實鼓愈甚而康有爲梁啟超等乃以奇才大才屢登薦剡大局  
幾於不測今逆首雖已遠遁逆黨亦已伏誅習染勢難盡去當此京察大典固 朝廷黜陟明轉移人  
才之會也誠使內而各部院堂官外而督撫無敢輕心保薦顯干濫保定例能於屬員中之才華發越者



俟其經練濃厚樸實者較以資格則資格中要不乏老成練達之人而少年經練之餘實足損過就中俾人才一軌於正人才之邪正庶事之廢興因之大局之安危尤係之又況定例至爲嚴明本無可追聖訓至爲詳盡本當懷遵凡有保薦之責者正無容妄逞私臆更於成法外別求舉劾之方也 上諭御史熙麟奏京察屆期請飭重申定例一摺京察爲黜陟大典激濁揚清所貴轉移風氣若如所奏近來京察保薦人員其才華發越者固易爲人推許其疎厚樸實者往往無所見長相習成風成何政體現在已將屆期著各部院堂官認真考察懷遵疊次諭旨申明定例果有才猷出衆者自應首選餘則寧取疎厚樸實一流其才華發越未經歷練之員仍隨時留心作育俾得成材毋得任情去取稍涉冒濫將此通諭知之○丁丑諭袁世凱電奏山東平陰肥城兩縣匪徒聚眾滋事將教士劫至毛家鋪地方詢署撫多方設法救護並派馬隊兜拿卒以防護不及被匪殺害教士等語覽奏殊深惋惜各國傳教職在約章迭經諭令各該督撫嚴飭地方官隨時隨事認真保護奚止三令五申乃山東地方竟有教士被害之事該地方文武各員事前疏於防範已屬咎無可辭若不卽將兇犯趕緊緝獲尙復成何事體著袁世凱迅速將疏防之該管各官先行參處一面督飭嚴緝兇犯務獲懲辦以靖地方而敦鄰好○戊寅唐炯奏雲南辦順全恃春秋冬三季冬季每月可得銅十一二萬春秋兩季每月可得銅七八萬不等夏季地氣上升磧

銅積水難於攻採民間至時停歇公司則不惜工本另開通風洩水以便攻採每月尙可得銅四萬常年  
廢情大率如此本年自四月至五月杪連月大雨中間晴霽不過數日公司所辦巧家永北宣威威寧各  
廠礮礮悉被水淹甚或坍塌不能採礦辦廠以柴炭爲第一要需各廠在萬山中柴炭皆購之三四百里  
外爾多路險轉運甚難遂爾缺乏不能煎鍊又爐座爲濕氣浸漬火力不順礮砂往往不能團結煎鍊十  
爐只成四五總計夏秋兩季每月得銅二萬餘斤多止三萬較之往年短缺過甚而公司賠累因之亦鉅  
臣每接公司稟報午夜焦灼現在天氣晴霽已飭公司設法趕辦惟修理礮礮爐座開通水洩轉運柴炭  
展轉耽延煎鍊尙需時日本年銅斤實不能辦足二批此則天時所致非公司人力有未盡亦臣意料所  
不及理合據實縷陳仰求 聖慈垂鑒得 旨知道了卽著督飭公司設法趕辦儘數起運○裕祿奏前  
據直岸各商以運道艱滯商力難紓稟請設法拯救等情經升任運司萬培因援案詳經奴才奏請每包  
加酒耗鹽二十斤以五年爲限旋經戶部議復每引若加耗鹽二十斤以直岸應銷四十三萬一千三百  
九十餘道計之約共加鹽八百六十二萬七千八百餘斤共合引一萬五千六百八十二道近年銷路如  
故忽以無課之鹽八百六十餘萬斤行乎其間鹽愈多則銷愈滯銷愈滯則課愈絀卽謂課額山商包納  
無論銷引多寡均可勒令商人包完而加課一項設有短少又將誰認請毋庸議等因咨行飭遵去後茲

據署理長蘆運司方恭鈞詳稱據直岸商人等有等稟稱遵查此次求加滿耗者但求補鹽包內之傷耗非敢於鹽包外溢額求增也查國課商引根本皆在灘鹽昔年灘存老鹽囤積既久潮氣全消運到引地傷耗無多自光緒二十一年海嘯大災以後老鹽盡行衝沒灘鹽多半失修新晒之鹽隨出隨運鹽質太嫩中含潮水運過關時按照部估斤兩悉符迨途中起駁數次抵廠後裝車陸運席皮損壞拋擲已多船車偷盜查禁尤難計自津起運以至抵岸出售固時半年之久風吹日炙出潮尤多每包有虧鹽四五十斤者有虧鹽六七十斤者所存不過九成之鹽每年仍納十成之課往年尚可支持者賴有津貼商累之賑墊加價稍資挹注今則加價已提七成歸公虧折無從彌補又值各河淤塞淺阻鹽船大半不能抵廠本年鹽斤傷耗更甚於前商等原請加鹽四十斤藉抵沿途虧耗今奉戶部駁斥以爲所加者係屬無課之鹽而不知商等所求者實免無鹽之課至於銷引之暢滯惟在歲時之豐歉實不關區區之耗鹽查直岸一百三十餘處每岸額引一二千者居多尙有不及千引者加耗之鹽數在一百三十引岸爲數無幾原定之引自必仍舊領足斷不肯棄尼客之引包納全引之課前次預引加耗足可取證實與銷路無妨引目既不少領加價自不短交此又勢之相因無待煩言者也商累爲虧課之漸恤商實保課之源若不力加挽救竊恐直岸之殷商盡累累商盡參縱有加價之名無商輸納不待數年引積岸懸課虧餉絀

實與蘆綱大局關係甚重仍請每包加耗四十斤予限五年以補商虧而保課本等情稟經該署司方恭  
鈞查核該商等所稟均屬實情若不量予調劑商力難支勢必參懸相繼於課帑加價均有關礙惟每包  
請加耗四十斤爲數太多仍請每包暫加二十斤以五年爲限詳請具奏前來奴才擬加查核委係實在  
情形合無仰懇 天恩俯准仍照前請除向不加價之永平七屬及天津一縣毋庸加耗外其餘直岸引  
鹽每包暫加油耗鹽二十斤予限五年以紓商困而保課本允之○壬午錫良奏岳州關開設商埠前經  
督臣張之洞本任撫臣俞廉三請將分守岳常澧道移駐岳州兼管岳州關監督事務並請頒監督關防  
奏蒙 恩准在案奴才接護撫篆後以關務繁重派委熟悉交涉之署糧道蔡乃煌前往會同署岳常澧  
道張鴻順將開關事宜妥慎商辦務伸自主之權茲據會詳稱勘定岳州城迤北附近洞庭湖水入江之  
處名城陵磯設關最便一切修造關廨屯棧等事工費繁鉅商由稅務司詳細估勘次第舉辦現就原有  
官房略加繕葺暫爲辦公之所本年十一月十一日開關所有驗貨徵稅均按照關章辦理並由關道照  
會駐漢口各國領事轉飭商民知照等情詳請奏咨前來伏查岳州逼近漢口惟由江入湖及自湘運鄂  
之貨道所必經稅務能否暢旺尙無把握惟有督飭該道將應辦事宜認真經理總期取益防損以維大  
局而保利權至監督關防尙未頒發來湘現在該關一切文移單照等件仍暫用湖南分守岳常澧道關

防以昭信守下所司知之○增祺奏案准查辦事件前四川總督臣李秉衡咨開十月初一日辰刻據電報局送到總理衙門九八九號電一件計一百二十七字卽照己亥新法本譯出電碼字句種種可疑訊據送電人張國祥稱係司事馬民澤面交伊手餘不知情遂傳訊該局委員余華柏回稱本電局並無此號來電實係假電不知何人所捏並將馬民澤傳到事關假造 電旨實屬膽大妄爲咨請嚴究計黏假電一件等因當經札飭驛巡道提案審辦去後茲據該署道徐鏡第詳訊據司事馬民澤供稱該委員余華柏有買賣銀兩取利情事九月二十九日晚伊將京局打來發鈔 上諭電報封好報房取本日發出官商各報底回見司事黃厚堃將封筒重捆余委員在旁必是余委員乘空令黃厚堃將假電換入封筒等供質之黃厚堃則稱余委員買賣銀兩實有其事至假電一節概諉不知案關牽涉委員應如何辦理之處詳請核辦前來查假電意在減定銀兩價值既據馬民澤等供稱該委員余華柏有買賣銀兩取利之事自應一併提訊以期水落石出除批飭該道再行研訊確情分別詳辦外相應請 旨將留奉候補縣丞余華柏暫行革職歸案候審得 旨余華柏著暫行革職歸案嚴行審訊○癸未 上諭勤政殿日本國使臣西德二郎覲見○譚鍾麟等奏 上等恭讀十月初七日奉 上諭近來各省貧民生計維艱著各督撫督飭地方官確切查明開荒地畝實有若干剴切曉諭民間盡力墾種勿得視為具文一奏塞責

等因欽此查廣東省農務大概情形於去冬開辦農工商局經臣譚鍾麟附片奏明在案本年五月欽奉  
寄諭飭令查勘荒地勸諭開墾等因復經通飭各屬迅速查復遵辦茲據各屬州縣先後詳稱無曠土  
可開墾者十居八九等查廣東省三面濱海地狹人稠一歲三收農力已竭茶葉果木到處成林地利  
亦盡人多無田可耕野無不耕之土故安分者出洋爲商游惰者非賄即盜覓法橫行爲饑所驅亦良可  
憫如沙田一項初開出口白坦追生蔓草曰草坦農民認墾蒙強佔據隱匿在所不免實無廢棄之地惟  
瓊州府屬向多荒蕪比來有水源者悉已開墾成田所未墾者非斥鹵之區卽沙磧之地或種樹木或築  
陂池民間均能相度經營南澳地方有舊鹽田千餘畝荒蕪已久又海口湫出新坦一片須築長堤以捍  
潮汐可墾出田千餘畝現亦飭令妥速籌辦此外如有閒荒地畝概令地方官督飭村民盡力墾種勿任  
群差欺飾俟招墾確有實數再行詳悉彙奏以副 聖主軫念民生之意得 旨知道了仍著督飭地方  
官隨時查勘如有閒荒地畝著卽墾種毋任荒蕪欺飾○乙酉諭近來各省盜風日熾教案疊出言者多  
指爲會匪請嚴拿懲辦等因惟會亦有別彼不逞之徒結黨聯盟恃衆滋事固屬法所難宥若安分良民  
或習技藝以自衛身家或聯村衆以互保閭里是乃守望相助之事地方官遇事若不加分別誤聽謠言  
概目爲匪株連濫殺以致良莠不分民心惶惑是真添薪止沸爲淵驅魚非民氣之不靖實辦理之不善

也我朝深仁厚澤涵濡二百餘年百姓食毛踐土具有天良何致甘心盜弄自取罪戾全在各省督撫慎擇賢吏整頓地方與民休息遇有民教詞訟持平辦理不稍偏重平日足以孚民望遇事自足以服衆心化大爲小化小爲無固根本者在此聯邦交著亦在此各省督撫受恩深重共濟時艱必能仰體朝廷子惠元元一視同仁至意嚴飭地方官辦理此等案件祇問其爲匪與否雖毀與否不論其會不會教不教也吾民亦當以保衛桑梓身家爲務勿事煽惑以構禍端勿挾極勢以欺鄉里庶閭閻安謐藉紓宵旰憂勤是所至要將此通諭知之○丙戌裕祿奏奴才前准戶部咨撥項奇絀用度不敷謹擬籌餉六條藉資周轉光緒二十五年九月十四日奏奉 諭旨依議欽此當經分行飭遵去後茲據署理長蘆運司方恭釗詳稱查原奏內開兩淮鹽票按引捐輸長蘆等處有按引按票之不同應令仿照兩淮捐輸崇本章程就本地情形酌定辦法勸諭各鹽商按年捐輸一次仍將擬捐銀數一年共計若干先行報部不得以他省鹽務與兩淮有異諉謂商人無力交納任意宕延等因飭據通綱商人皆有爭等一百二十四商以蘆綱向來按引領鹽本與兩淮按票引鹽情形迥異直隸各岸連年災歉銷滯運艱本年又患旱荒麥秋大形減色商情困累不堪委屬無力輸將並非藉詞推諉稟經該司以國用孔繁庫儲奇絀該商等食毛踐土具有天良自當仰體時艱力圖報効又經剴切勸導冀益餉需復據該商等稟稱蘆綱各商向慕急公

之議若遇各省災賑各項工程無不踴躍捐輸不遺餘力何獨於部飭之件轉敢諉延惟念領票交款遲年加增春秋兩運已形竭蹶本年將賑墊加價提撥七成歸公計銀二十餘萬兩物力祇有此數殷商積疲成累其素稱疲累者更不能支種種爲難委非欺飾惟既蒙諄諄勸勉曷敢不於無可設法之中勉圖報稱擬請自光緒二十六年春開爲始每年通綱捐輸銀三千兩無論京外各商領引一道攤捐銀五釐另款存儲俟冬月封關後湊足銀三千兩聽候提用聊抒芹獻之忱等情稟由該司駁明詳請具奏前來奴才查該商等每年認捐銀三千兩爲數雖屬無多而連年綱情疲累亦係實在情形勢難另籌鉅款應請自光緒二十六年春開起無論京外各商每引捐交銀五釐俟封關湊足稟繳聽候撥用下戶部知之○戊子松壽奏奴才承准軍機大臣字寄光緒二十五年七月二十七日奉 上諭江西地方西連湘鄂東接皖吳爲長江扼要之地且南嶺等屬匪連粵境近年時有會匪出沒該省防練各營共有若干近來分布扼紮是否足資得力臬司陳澤霖於營務訓練事宜尙能諳習卽著將江西全省營務責成該臬司認真經理切實講求應如何分派駐紮勤加操練隨時稟商松壽妥議辦理該撫仍不得以經理有人稍存推諉將此諭知松壽並傳諭陳澤霖知之欽此伏查江西水陸各軍自迭次裁減後所存無多均分駐各府廳州縣以資巡防嗣經抽調陸軍各員弁勇來省並添募設立威武新軍前後左右中五營並調剛



字中左右三營弁勇六百名會同駐省之親兵營振武軍一體操習洋操共計弁勇三千餘名其省外各營新勁營駐紮九江忠字營駐紮南安新字營駐紮鉛山弋陽贛禮字營駐紮義甯州義字營駐紮贛州府屬安字營駐紮會昌瑞金長寧海字營駐紮新城臨川金谿剛字中左右三營則分駐安吉袁州及永新永甯等處以上共計弁勇二千餘名江軍內河贛防之永師共計弁勇二千四百餘名分駐省河上下及贛州等處誠以江西界連六省險峻林立鄰匪游勇時虞竄擾旬結故不得不分派駐紮巡防以昭周密欽奉前因當卽欽遵行知茲臬司陳澤霖業已抵任復札飭於按察使署內設立全省營務處遵旨傳諭臬司將江西全省水陸防練各營逐加查閱認真切實講求如有分紮未能扼要之處酌量調派並嚴督各營官勤加訓練認真操防痛除缺額扣餉等弊以期兵歸實用餉不虛糜得旨知道了仍著督同陳澤霖加意訓練俾成勁旅毋得日久生懈○庚寅命前內閣學士兼禮部侍郎銜陸寶忠仍在南書房行走○諭載漪等奏遵保虎神營出力員弁開單呈覽各摺片虎神營自成軍以來經該王大臣督率全營翼長認真訓練頗著成效所有出力兵弁不無微勞足錄內閣學士兼禮部侍郎銜溥興著交部從優議敘候補道有泰加恩著以五品京堂候補翼長萬順等暨單開之侍衛溥敦等所請獎敘均著該部議奏○以恭修會典告成予提調那桐等獎敘有差○甲午諭軍機大臣等有人奏知州賈財嗜酒縱

盜殃民請飭查辦一摺據嶺山東調營濟甯直隸州知州汪望庚利心太重沈湎於酒其子弟家丁幕友亦無不以利爲事去年赴鄉勘災撥款斂錢辦理昭信股票及平糶均有營私入己情事審理案件諸多乖謬民人呈報盜案輒窮加詰責以致盜風愈熾小民不能安業等語吏治爲民生所繫似此貪劣之員豈得姑容著袁世凱按照所參各節確切查明據實參辦毋稍徇庇原摺著鈔給閱看將此諭令知之○內中諭著傳恭親王河俾貝勒載瀛載潯載瀾大學士御前大臣軍機大臣內務府大臣南書房上書房部院滿漢侍衛等於明日伺候○丁酉諭朕冲齡入承大統仰承 皇太后垂簾訓政殷勤教誨鉅細無遺迨親政後正際時艱亟思振奮圖治敬報 慈恩卽以仰副 穆宗毅皇帝付託之重乃自上年以來氣體違和庶政殷繁時與叢脞惟念 宗社至重前已籲懇 皇太后訓政一年有餘朕躬總未康復郊壇 宗廟諸大祀不克親行值茲時事艱難仰見 深宮宵旰憂勞不遑暇逸撫躬循省寢食難安敬溯祖 宗締造之艱難深恐勿克負荷且入繼之初曾奉 皇太后懿旨俟朕生有皇子卽承繼 穆宗毅皇帝爲嗣統系所關至爲重大爰思及此無地自容諸病何能望愈用再叩懇 聖慈就近於宗室中慎簡賢良爲 穆宗毅皇帝立嗣以爲將來大統之界再四懇求始蒙 俯允以多難端郡王載漪之子溥儀繼承 穆宗毅皇帝爲子欽承 懿旨欣幸莫名謹敬仰遵 慈訓封載漪之子溥儀爲皇子將

此通諭知之○諭明年正月初一日 大高殿 奉先殿著大阿哥溥儀恭代行禮○諭著傳王公大臣等於二十六日均穿蟒袍補褂並遞如意二柄○諭大阿哥正當典學之年嗣後大內著在宏德殿讀書駐蹕西苑著在南殿讀書派崇綺為師傅授讀並派徐桐常川照料○己亥欽奉 慈禧端佑康頤昭豫莊誠壽恭欽獻崇熙皇太后懿旨禮部奏元旦朝賀恭行禮儀各摺片明年元旦皇帝在寧壽宮行禮後予仍御皇極殿受賀大阿哥溥儀及王貝勒貝子在皇極殿內行禮二品以上文武大員在皇極門外行禮○辛丑欽奉 慈禧端佑康頤昭豫莊誠壽恭欽獻崇熙皇太后懿旨明年皇帝三旬壽辰應行典禮著各該衙門查例具奏○壬寅諭明年朕三旬壽辰著毋庸舉行一切典禮所有升殿禮儀著停止○諭明年朕三旬壽辰允宜特開慶榜嘉惠士林著以明年庚子科為恩科鄉試次年辛丑為恩科會試著遞推於辛丑壬寅年舉行用示行慶作人有嘉無已至意○諭明年朕三旬壽辰王公百官仍著穿蟒袍補服七日○諭明年朕三旬壽辰各省督撫及將軍提鎮等俱不准奏請來京祝嘏○諭有人奏知縣苛罰擾民聲名狼籍請飭查辦一摺據稱山東萊陽縣知縣徐壽基與劣紳劉桐恩父子勾通恣為奸利屢次藉案科罰假平糶為名提用書院經費分噬肥己任令劉桐恩糾合地痞流氓到處搶劫該縣現經毓賢勒告終養請飭將侵吞公款澈查追繳等語著毓賢按照所參各節確切查明據實參辦毋稍徇縱原摺

著鈔給閱看將此諭令知之○貽祭 太廟遣載勛恭代行禮○是年統計出口貨直銀一萬九千五百七十八萬四千八百三十二兩進口貨直銀二萬六千四百七十四萬八千四百五十六兩相抵虧六千八百九十六萬三千六百二十四兩凡徵貨稅銀二千六百六十六萬一千四百六十兩

東華續錄

光緒一百五十八

臣朱壽朋敬編

臣沈彭年恭校

光緒二十六年庚子春正月甲辰朔 上詣寶壽宮 慈禧端佑康頤昭豫莊誠壽恭欽獻崇熙皇太后  
前行禮御乾清宮受賀○諭本年朕三旬壽誕內廷行走王大臣勤勞素著允宜特沛殊恩御前大臣慶  
親王奕劻克勤郡王管祺喀爾喀扎薩克親王那彥圖端郡王載漪均著賞加二級並賞給御筆匾一面  
軍機大臣禮親王世鐸大學士榮祿協辦大學士王文韶均著賞加二級並賞給御筆匾一面協辦大學  
士剛毅禮部尚書啟秀均著賞戴花翎刑部尚書趙舒著賞給帶藤額掛用示恩綸錫羨至意○諭本  
年朕三旬壽誕適屆履端初吉推恩之序允宜首重親親恭親王溥偉醇親王載澧均著加恩賞給蟒袍  
一件御筆壽字一方貝勒載瀅載澂載潤貝子奕誼溥儀溥洵鎮國公載澤載洵不入八分輔國公載瀾  
載瀾鎮國將軍載淦溥儀均著加恩賞給棉兩疋福字一方用示篤念宗支至意○乙巳諭張之洞  
于蔭霖電奏前奉電諭令各省將關稅鹽課釐金裁去陋規以充公用迅將實在數目奏報據湖北稅  
釐鹽課三項及州縣丁價平餘皆經逐加整頓無可裁提又極言近年來戶部提撥之多該督等籌畫之

苦著以後每年總督捐助銀二千兩巡撫以下分別遞減共捐銀七千七百兩等語現在時局艱難張之洞等手握疆符受恩深重目擊庫欸支絀自應通盤籌畫極力刪除浮費以杜中飽而充正用非令其搜括民財亦非令官吏勉強報効也如實在無可裁提亦應據實奏明詎可敷衍塞責昨據裕長奏到願通省捐銀十萬兩當以欸非陋規中飽地方官應加體恤諭令免其提扣張之洞久任封疆創辦各捐開支國家經費鉅萬卽以湖北一省而論豈竟弊絕風清毫無陋規中飽乃以區區之數託名捐助實屬不知大體張之洞于陝霖均著傳旨嚴行申飭所捐之項著不准收嗣後如實在事關緊要准其簡明電奏著尋常應行奏咨事件均不得擅發長電以節糜費○戊申諭前經降旨令崇綺充大阿哥師傅在內授讀並派徐桐常川照料現在大阿哥典學伊始讀書課程關繫緊要著黃成徐桐崇綺選擇品學兼優者二三員據實保奏候旨簡用○己酉諭朕維拔真才以濟實用首在端學術以正人心我朝取士之法備載於 欽定科場條例 欽定學政全書 聖訓煌煌罔弗斟酌盡善凡有校士之責者允宜懷遵成憲勿作聰明方不至亂正學而壞風氣前經禮部奏請切實申明舊制當經照依所請由該部行知各省學政暨鄉會試正副考官務當恪遵學政全書科場條例內載 聖訓及 欽定各條款實力奉行不准稍有違悖於維持 祖法振興聖道大有關係所以爲培養人材挽救人心計也惟自通行以後各省

學政能否力除近年邪妄之習一歸於正朕心關念實深著各省督撫隨時查訪該學臣倘有陽奉陰違視祖法聖道爲具文仍復喜新好異禍及士林者卽行據實嚴參朝廷絕不寬貸嗣後科歲考前列試卷到部如經磨勘有文體不正之處卽將該學政及覆不查參之督撫從嚴議處如不認真磨勘一經發覺定將該磨勘各員照徇庇例議處至現值連年舉行鄉會試正羣才乘時登進之期禮部除將前次奏准摺片知照正副考官外並將此次特降諭旨一體行令恪遵總期學臣考官惟以祖法聖道爲取士定衡其稍涉離經背道者立予擯棄俾眞實正大之才無虛向隅而多士觀感奮興羣趨正軌永不至爲種種奇袤所惑貽誤終身朕實有厚望焉○劉坤一奏蘇州府屬新陽縣轄境地廣人稀承平已三十餘年尙有荒蕪額田約十萬畝無人耕種奸民任意私佔又不完糧不願有人開墾光緒十五年曾有客民願聚私墾未經報官議章旋因土客不和經前護撫臣黃彭年飭派印委會同驅逐附片奏明有案迄今又閱十年田荒如故地利未闢殊爲可惜現值清理田賦之際又疊奉諭旨飭辦墾荒未便因噎廢食聽其荒蕪查定例各直省實在可墾荒田無論土著流寓俱准報墾取結給照限年升科等語今新陽縣前項荒田既屬實在可墾自應查照定例酌議章程由官設局辦理以裕正賦擬查明多年未徵錢漕並無執有契串業戶是爲無主之荒一律作爲官田招集良莠客民認領墾種酌分田地場三等上等繳價

錢二千文中等一千五百文下等一千文名爲繫腳錢庶免旋舉旋拋取其保結備價繳縣核明填給印  
照准其作爲已業專立戶冊畝冊仍照蘇省新墾章程俟屆三年後放徵並聽其轉售過戶此等額田地  
荒一畝卽熟非穰瘠開荒者可比應於三年之內酌分等差薄收租息秋後由縣催繳存俟撥充公用不  
准土民於客民墾熟後妄事爭奪其有主荒田既不耕種又不完糧亦應勒限報明令其立時自墾逾限  
不報不墾一體入官招墾如敢滋生事端不論土著客民卽行從嚴懲辦得 旨如所請行○庚戌諭大  
阿哥於正月二十七日申刻入學讀書○諭榮祿奏提督力疾銷假懇恩派員會辦一摺總統武衛左軍  
四川提督宋慶老成宿將威望素著前因病迭次賞假調理現據稱病體尙未痊愈精力尙可支持力疾  
銷假且見忠奮之忱所有武衛左軍各營仍著該提督統率認真經理並派馬玉崑爲該軍會辦以資襄  
助○辛亥祈穀於 上帝○諭本年秋審刑審情實各犯均著停止旬決○允鹿傳霖奏子故河南河陝  
汝道尹耕雲政績交國史館立傳○壬子時享 太廟遣載漪恭代行禮○癸丑諭軍機大臣等前經諭  
令錫振前往奉天接統仁字軍嗣據將軍因病奏請開去差使亟須有得力大員接統昨召見前青州副  
都統訥欽尙屬曉暢戎機於奉天情形亦頗熟悉著接充仁字軍統領會商增祺將一應操防事宜認真  
整頓奉天係根本重地練兵爲常務之急訥欽膺茲重任務須破除情面力圖整頓督飭營哨各員加意



訓練精益求精勿員委任將此諭令知之○乙卯黑龍江將軍恩澤卒賜卹如例○增祺志彭奏上年冬間欽奉 懿旨舉辦團練所有籌辦情形等因經前任將軍依克唐阿護理將軍文興署副都統管昌等並奴才增祺於本年八月間覆陳地方緊要事宜摺內先後陳明各在案其時尙有鳳凰寬甸牛莊海城蓋平各處以經費難籌刻辦棘手錦州則因連年被匪滋擾未能辦齊迭經分飭上緊籌辦嗣錦州一帶劇賊均已授首餘匪悉就擒獲復經奴才增祺會同前奉天府府尹恆壽一面電飭該府縣一面出示勸諭務令趁此大軍未撤一氣辦成免致再被賊擾該紳民人等痛定思痛勸辦無不踴躍樂從該縣又復盡心其事兩三月間計一百四十餘屯三萬餘人辦成二十二團即朝陽附近各屯亦多歸附聯絡聲勢爲之一壯其鳳凰等屬縣時值中秋並皆一律辦齊綜核通省二十五屬計二千五百餘團團丁十萬數千餘家如承德興京懷仁廣寧遼陽復州鐵嶺開原奉化海龍懷德暨各旗界所屬鄉團各番勇擊賊或隨時緝捕核其報明有案者已獲盜一百餘名昌圖義州通化錦州不特團丁一律精強且能疊擒巨盜爲成效之尤著者所有出力勇丁或經隨時給獎功牌頂戴或酌量批給銀錢受傷陣亡亦與官兵給卹無異俾其奮興觀感更不難日起有功茲據團練總局開單呈請查核前來奴才等伏查團練爲弭盜固在奉省尤爲切要今既通省一律辦齊著有成效奴才等仍應督飭實事求是並由團練總局即時派

員分路稽察倘各該地方官因循怠惰又劣紳藉端苛派擾民卽行分別參辦斷不敢稍事姑容庶得歷久無懈人盡知兵緩急足有可恃以冀仰副 朝廷保民綏邊之至意報聞○戊午諭前因康有爲聚散超罪大惡極迭經諭令沿海各省督撫懸賞購緝嚴密緝拿迄今尙未弋獲該逆等狼子野心仍在沿海一帶煽誘華民並開設報館肆行黃鼓種種悖逆情形殊堪髮指著南洋閩浙廣東各省督撫仍行明白示諭不論何項人等如有能將康有爲聚散超緝獲送官驗明實係該逆犯正身立即賞銀十萬兩萬一該逆犯等早伏天誅只須呈驗屍身確實無疑亦卽一體給賞此項銀兩並著先行提存上海道庫一面交犯卽一面驗明交銀免致展轉稽延如不願領賞願爲實在官階及各項升銜亦必予以破格之賞至該逆犯等開設報館發賣報章必在華界但使購閱無人該逆犯等自無所施其技並著各該督撫實力嚴查如有購閱前項報章者一體嚴拿懲辦此外如藏有該逆等從前所著各逆書並著嚴查銷燬以伸國憲而靖人心○甲子諭軍機大臣等黃槐森奏通判捕匪遇害調營剿辦一摺廣西那馬通判譚鵬獲匪訊押匪首黃大糾黨奪槍該通判倉卒抵禦被戕實堪憫惻著加恩照陣亡例從優議卹惟首匪黃大未獲仍著嚴飭捕獲究辦廣西伏莽未靖該撫務當嚴飭地方文武平時實力清查巡緝以杜亂萌而清邊徼○諭裕長奏河北三府災歉情形一摺上年河南省河北三府得雪已遲卽使補種春麥收成在四

月以後民間拮据情形殊堪軫恤加恩著將本年江浙等省海運漕糧截留三萬石交裕長飭屬分別災情輕重賑卹兼施以資接濟該撫務當督率印委各員悉心經理總期實惠及民用副朝廷軫恤災區有加無已至意○陳麟龍奏竊維堯舜周孔之道燦著經傳炳如日星人倫之範圍家國之矩矱胥於是乎在我朝聖聖相承心傳遙接文謨武烈千古昭垂凡所以正學術端士習者久已布在方策纂入科條承學之士果能實事求是身體力行何至見異思遷動爲奇袤所中近今學校之弊其始病在專習浮文而不求實學名爲代聖賢立言實則揣摩剽竊無關要道學者半生精力悉耗於此以致無暇讀書卽以經史茫然不知以之從政臨民安能有濟無怪乎爲世詬病也矯其失者又託於治經自命漢學箋注蟲魚分門立戶其弊至於釋堯典鳴摯二字引證累數千萬言支離破碎毫無心得此輩倖列朝籍互相標榜矜負清流一旦任以艱鉅罔不愆事貽誤大局甚或跡弛自放蕩檢踰閑無益國家有壞風氣安用此買馬許鄭爲哉咸豐同治之間士大夫踐魏源何秋濤徐繼畲等餘習專言時務而以諸子文飾之學派又爲之一變履霜集報浸淫至於康有爲梁啟超二逆變本加厲喪心病狂乘朝廷力求自強之際悚以危言竟欲刪改聖經崇尚異學浮薄之士靡然從風依盧旁行之字幾徧天下一若不通外教不效西人舉不得爲士君子風至此敗壞極矣實爲古今奇變非聖無法罪通於天雖兩觀之誅尙

稽而其言僻行豎與其悖逆罪狀纒經 宣布明綸早已顯暴於天下稍知順逆者莫不有寢皮食肉之  
思可知是非之正好惡之公秉輟所同是宜提倡止學闡揚聖教以滌其醜染而定其指歸庶幾聖道大  
光羣言盡熄以復我 國家稽古右文之盛治本年正月初六日欽奉 上諭諄諄於整正文體嚴定校  
士之法臣跪聆之下竇深欽佩薄海士庶自必幡然嚮往奇袤之辭斷不敢再爲嘗試是校士之道已復  
大中至正之規矣臣愚以爲校士與教士其道相爲表裏校士應一時之去取祇能辨文藝之純疵教士  
在平日之栽培必能知人品之邪正學校不儲正士試場安有真才是循序漸庠爲人才升降所關不可  
不於此加之意也恭讀 聖祖仁皇帝聖訓於學校教士之法反復誥誡勒爲臥碑書院章程載在會典  
亦復深切著明試官雖係糊名而學政職司風化輶軒所至有采訪懲勸之權下至司訓一官亦有舉優  
注劣之職果能實力奉行則庠序皆循飭之儒應試斷無邪說之士又安有離經畔道如市梁二逆者出  
乎其間哉是學校爲儲才根本不於此認真教育譬如源之不清而欲其流之不濁得乎抑臣更有慮者  
往年遭康梁之亂舉國若狂人人競言新學而不軌於正幾貽 宗社之憂懲斃吹噓不得不歸本正學  
以救其失今試士既復舊制誠恐安於固陋者又蹈前積習相率剿襲雷同而不求實際是因噫而廢食  
矣 朝廷所望於多士者果安在乎擬請 飭下京師督學大臣各省督撫學政凡有教士之責者務各

宣明聖學加意提倡嚴定課程寬籌經費多購正經正史一切經濟性理有用之書慎選生徒專門肄習  
俾成國家有用之才經史果能淹通時文自有根柢不得但工帖括弋取科名貽人口實書院師長務擇  
經明行修品望素著之儒盡心訓迪官師考藝而外專以敦尚品誼為主諸生中果有品端學粹扶翼聖  
教志在匡時者隨時從優獎拔俾底於成其有內行不修鄉評不許放言高論氣負驕張沾染康梁惡習  
者嚴斥而痛懲之不稍假借至於朔望釋菜宣講 聖諭廣訓諸儀節尤當敬謹將事不得視為具文禮  
教以束其躬詩書以擴其志此教士之本也世變亟矣非昌明聖學無以祛積惑而挽橫流不拔取真才  
何以濟時艱而培 國脈聖賢傳之所在卽人倫風化之所關學術不謬士習自端人心自正習莪棫  
樸無非楨榦之才矣 上諭內閣侍讀學士陳燮龍奏士風日漓請飭整頓學校提倡正學以祛積惑而  
儲真才一摺從來保邦制治首重求才而人才之興端由學校不儲正士試場安得真才現在鄉會試已  
復舊制衡文校士之法昨已訓切宣示文體既正不致有奇袤之作出於其間第恐士習安於固陋又蹈  
從前積習揣摩剽襲不求實學是因噎而廢食矣朝廷所望於多士者果安在乎該學士奏稱校士興教  
其道相爲表裏校之於一旦要在教之於平時自是採本之論京師管學大臣各省督撫學政凡有教士  
之責者務令宣明聖學加意提倡嚴定課程寬籌經費多備正經正史一切經濟性理有用之書慎選生

徒專門肄業俾成有用之才不得但工帖括弋取科名貽人口實書院山長務擇經明行修品望素著之  
儒盡心訓迪官師考藝之時專以敦尚品行爲重諸生中果有品端學粹志在匡時者自應從優獎勵務  
底於成其或內行不修鄉評不洽放言高論氣質驕張沾染康梁惡習者嚴斥而痛懲之不稍假借至於  
朔望釋菜宣講 聖諭廣訓諸儀節尤當敬謹將事不得視爲具文學術既正士習自端人心風俗亦必  
因之轉移強國之道端基於此譽髦斯士宏濟時艱朝廷有厚望焉○以癸丑爲工部左侍郎世續爲工  
部右侍郎○乙丑劉坤一奏 臣接准部咨帶項奇絀用度不敷奏准籌款六條行令兩淮各票商查照從  
前奏案酌定上中下三則按年捐輸票本一次如果商情不願亦未便勉強即聽商告退之招新商承  
充限兩箇月將辦理情形籌集銀數專案奏報核辦等因遵經札飭運司遵辦去後茲據兩淮鹽運使江  
人鏡詳據鄂湘西皖四岸運商暨鹽恆等聯名稟稱伏查光緒六年部奏時艱籌備餉需一摺擬飭商等  
分上中下三則按年捐銀一次作爲票本會將運務岸務爲難實情觀悉稟陳當以邊防喫緊勉捐銀一  
百萬兩奏明准其永遠循環在案迄閱二十年商力之疲餘利之薄捐款之多銀根之緊種種苦況更有  
甚於往昔者請爲披瀝陳之一票價實係血本也查前任鹽政曾國藩改票伊始重釐課而不重票本其  
意利歸於上而不損下故恤商以立裕課之基是以奏定壞章票爲世業人始爭相購取一紙萬金而當

時原擬諸商現已飭委騰去商等湊銀買票均於斯時先後辦運稟准更名不意託業以來捐輸重疊休息無時以歷次捐資併入票價核算血本奚啻累萬原奏謂票價不減於前實則本重利艱誠恐漲價亦無人顧問一也一積綱苦難轉輸也自光緒八年前任鹽政左宗棠以籌餉驟增鄂湘新引六十票院引一百四十八票時因新商無力承辦仍令商等繳捐分領亦復給永遠循環執照奏咨立案嗣於光緒二十一年又經前署鹽政張之洞增湘鄂兩岸預引三十票院岸一百票及上年瀏陽所加新引十六票統計前後累加至八萬六千七百六十引之多迨至積綱難濟銷疲遲滯原奏謂近年銷數較暢誠未鑒及歷綱之困苦難轉輸現查湘岸積二十一綱鄂岸積十七綱西岸積十綱院岸積二十一綱各岸銷售遲速不同或二十箇月或十五大箇月不等成本重攤已苦難以轉輸若再按年加捐票價是前困未甦後累又至力誠不逮二也一捐款實苦繁多也查正供而外尚有雜捐輸將巨款又無歲無之固荷皇上優渥屢給獎敘賴此以鼓舞羣情現計光緒六年以後統共捐銀近八百萬兩加以運腳倉租辛工駁費無非取諸成本成本愈重獲利愈微日用衣食取給於茲祇以引票爲世業循環爲定章剝肉補瘡莫獲休養於異日今再按年加捐勢必顧捐誤運運誤捐關係實非淺鮮三也一市面深虞搖動也查揚州錢鋪殷實可靠者不過數家市上現銀時慮不敷周轉全賴上海鎮江漢口等處通融挹注近十年來錢

銀兩匯市情異常緊急各處銀號紛紛倒閉商等一遇徵輸巨款動形掣肘此實市面竭蹶情形卽如上年股票捐項挪繳爲難屢求寬限今若再捐票本實以常年是必跋前疐後倒欠頻仍一蹶難興何堪設想四也且兩淮商票散漫類多畸零小戶甚至有數商合辦一票者近年屢因捐務之重更易主不知凡幾此次市經泰諭人心惶惶欲退票而已之血本無著欲賣票而人且避之不遑原奏謂另招新商不患無人此誠商等所未敢懸擬斯時設有奸宄聞風暗通消息外洋乘隙干預此不惟商等身家性命之微求寶東南財賦全局所攸關當茲民窮財盡之時稍一更張洵可立待所陳各節固非一己之私藉詞推諉也查光緒十年十一兩年奉部議籌捐票價曾蒙前任鹽政左宗棠曾國荃先後奏覆有案在昔已難何況今日叩懇詳請奏免輸捐票本則商等有生之日皆出自再造之恩不勝踴躍待命之至等情經江人總督同總局委員反覆開導曉以大義勉以急公至再三不肯贊成各該商託業於斯亦非敢故意推諉無如成本太重利息太微捐輸太多銀根太緊體察情形委實不勝困憊該司覆查商情之進退全視獲利之盈虧從前捐款不多一票萬餘金人尙爭相購買近年輪納額仍本重利薄各岸票價大減於前其有舊商情願減價出售而人多徘徊觀望未敢承充者自奉飭捐票本之文外間議論紛紜商情頗極惶惑姑無論另招新商未必確有把握且鄂湘西皖四岸爲淮南關務之大宗各商辦理有年



我國家固有之課釐歲以數百萬計東南大局所關非細光緒六年前署督臣吳元炳奏請免捐常年票本一摺有藏富於國不如藏富於商恤在一時止所以備緩急於異日等語實爲不刊之論何況今日情形比較光緒六年時又已大異肝衡大局察核商情不能不代爲呼籲等情詳請奏咨前來合無仰懇天恩俯念商情極困免其常年捐輸仍准循環轉運以保餉源下部議奏○丁卯諭三載考績國家激揚大典中外滿漢諸官有能恪共職守勞勩最著者尤宜特加甄敘以示優異茲當京察屆期吏部開單題請詳加披閱親王世鐸大學士榮祿協辦大學士兵部尙書剛毅協辦大學士戶部尙書王文韶禮部尙書趙舒翹副費樞廷公忠共矢襄理庶務悉協機宜均著交該衙門從優議敘大學士徐桐碩德耆年品端學粹著交部議敘大學士署兩廣總督李鴻章兩江總督劉坤一老成碩望懋著勳勞均著交部從優議敘直隸總督裕祿湖廣總督張之洞四川總督奎俊雲貴總督崧蕃久膺疆寄任事實心均著交部議敘餘著照舊供職○奎俊奏奴才前准部咨光緒二十二年四月二十九日奉 上諭商務之振興者究爲何項各省設立學堂不容虛糜經費有名無實著各督撫將辦理情形一體奏報等因欽此伏查四川商務光緒二十五年經前督臣鹿傳霖奏准設局招商開辦前因風氣未開商情不免頓阻近以礦務大興亦多稟請承商者開辦至今則以白蠟公司爲實著成效蓋白蠟自設公司後凡行戶抑價捐買

及奸販擬假等弊爲之一清商民無不稱便從前落地盤金由行戶代收每年不過繳銀二三千兩今歸公司代收剔除中飽涓滴歸公自二十三年四月起至本年八月止計兩年四箇月共收解銀五萬六千餘兩較前增至十餘倍此商務振興之一大端也此外如重慶仿造泰西煙捲先僅出傳本省現亦製成大批運銷上海又所製洋蠟頗能合用若更精益求精當可抵制洋貨又成都車務公司既便行人而拉車貧民且可藉以養活其餘除重慶邛州各煤棧瀘州降昌各煤廠亦在陸續開辦逐漸推行竊維商務一事其大要在考究物產請求製造廣開銷路必須官商不隔盤氣素手者方能聯商情而廣招徠奴才所以奏請以三品卿銜李徵庸爲四川礦務商務大臣以候選道陳光弼會辦礦務商務已奉 諭旨允准在案一俟李徵庸到川當與晤商妥議竭力經營並將農工事務詳訂切實辦法務在能收地利斷不致積事推延空言塞責至川省學堂有二曰中西曰武備中西學堂係光緒二十二年前督臣鹿傳霖奏明開設並附算學館由總理衙門聘英文法文教習二員額定學生六十名肄習西語文字及地輿測算各國史策等學旋聘華教習一名俾知中西並重不致偏廢現經奴才傳集各生到署考試大抵英文法文字均能通曉其他造詣尙未克精惟算學一門不乏潛心研究之士統計一年用費需銀七千餘兩諸從樽節並無浮冒武備學堂係光緒二十四年前署督臣蔣麟派員由湖北採取章程回川試辦延訂教習

招選正額備額學生設立講堂操場試辦肄業專習測繪與算銀礮營壘等學當場道就其技藝之精熟者隨時挑選分撥各營教練洋操亦頗得力歲需經費共約銀二萬四五千兩前經奴才奏明動用本省扣存勇餉湘平一款奉 硃批該部知道欽此欽遵在案惟時艱餉絀不能不事舉格外節省已飭酌減一萬五千兩另案奏明仍隨時嚴飭委員責成該教習等盡心誘掖認真操演總期學有實用款不虛糜上副 朝廷作育人才稍核實之至意報聞○庚午德壽奏光緒二十五年四月二十二日欽奉 上諭御史潘慶瀾奏福建廈門設立保商局保護出洋回籍華商請飭海疆各省一併推廣等語通商以來沿海各省多有華民出洋貿易其隨時回籍者自應由官設法保護著南北洋大臣及沿海各督撫體察情形查照福建保商局章程遴選公正紳董妥為籌辦如有關津留難官吏苛索情弊即著從嚴究辦以恤商民等因欽此仰見 朝廷子惠黎元無遠弗届至意奴才伏查粵民出洋貿易人數甲於他省回籍時為關吏勢燮案詐在所不免當與司道籌議設局保護適據在籍二品頂戴按察使銜江蘇遇缺前先題奏道蘇元瑞來轅謁見奴才詢以粵民自洋回籍情形與之熟商籌款設局以資保護該道慷慨任事即與省城公正紳士籌商先在省城設立廣東保商總局並稱在局各紳不支薪水其局用司事人等常年經費每月約需銀一百餘兩該道勸諭紳商自行設法籌捐不動公款自開局後該局刊印空白護照

分寄外洋各埠之會館商董司理如有回華商民即將其人姓名年貌籍貫執業子母若干一一填註明  
晰並黏貼照相交本人帶回赴局驗明如有受人欺詐等事即報該局轉知地方官認真清理倘內地人  
口有被拐賣出洋者即由親屬赴局報明函知各埠會館董事客長查確稟明派駐該處之中國領事官  
資遣回粵該局一面稟由督撫咨會使臣轉飭照料其由粵出洋婦女幼孩取其保結赴局報明給予護  
照方准上船仍嚴禁禁詐刁難等弊嗣後各關稅務司查無粵局鈐記護照即予扣留省外沿海各處俟  
各局辦有成效再行體查情形推廣辦理以期周密等情復飭據海防善後局司道核明詳請奏咨前來  
奴才覆加確核所擬各節尚屬妥洽可行除咨總理衙門及南北洋暨出使各國大臣照會各國領事官  
知照並札飭該道遵辦外謹恭摺具陳 仰祈 聖訓 旨該衙門知道○增祺奏光緒二十五年六月十五日奉  
軍機大臣字寄光緒二十五年六月初八日奉 上諭奉天鹽釐雖經屢加整頓近今商販偷漏以及委  
員收多報少之弊仍不能免現當籌餉孔亟之時亟應嚴加整頓著增祺督飭印委各員實力認真稽察  
毋任利歸中飽夾私偷漏併能否再行加價體察地方情形妥定章程詳議具奏將此諭令知之欽此遵  
旨寄信前來 奴才遵即分飭各局據實稟覆並嚴密查訪緣奉天鹽務與各省不同向無富商大賈亦  
未劃分岸地多由商人向灘戶零星購買運往各處帶銷官中不過於產鹽之區設局抽釐計有八處金

州一局已歸租界現止蓋不復州岫巖甯達錦州廣甯常家屯七局銷路則水運少陸運多銷之於本省者多銷之於他省者少此其大略也若夫徵多報少則弊在局員偷漏走私則弊在商販近來刷給三聯印票有一斗至五斗一石至五石及每張十石之別單票存根按期送核從前徵多報少大頭小尾之弊已不禁自除惟各局所轄灘地遼闊陸路紛歧繞越走私勢所難免奴才業經屢飭實力稽查並於扼要處所准其添卡巡緝凡無票私鹽輕則酌令補徵重則卽予罰辦又有私造印票者亦經屢行拿究俾偷漏者莫敢效尤收數便當暢旺卽如復州一局雖三官廟分卡劃歸租界本年尙收至八萬四千餘兩蓋平一局報至九月底比上年已長徵四萬餘兩矣至於鹽之價值貴賤向由灘戶隨時自定局員僅止出示曉諭就灘抽釐設權之初每鹽一石僅抽東錢一吊二百文光緒初年前署將軍崇厚因練兵需餉奏明每石改抽二吊四百文嗣因練餉不敷又經前將軍崇綺每石奏加二吊四百文又光緒十七年戶部籌餉案內復於前收四吊八百文之外再加二吊四百文又前將軍依克唐阿因籌辦中學堂每石再加抽一吊二百文按東錢九吊合銀一兩每石已收銀九錢三分有零本年正月間依克唐阿覆奏戶部添議鹽斤加價摺內業將按灘加價亦未便再事加釐各節詳細敷陳奴才到任後悉心體察依克唐阿前奏尙屬實情應請暫照前議緩爲加價仍當隨時審度情形妥籌辦理下戶部知之○辛未恩澤奏天下

大利首在興農邊塞要區允宜闢土蓋土闢則民聚民聚則勢強此實邊之要道興利之良法也奴才自到任以來卽詳查本省屬內之扎賚特都爾伯特郭爾羅斯後旗等蒙古部落地面遼闊土脈膏腴可墾之田實多雖該族均以游牧爲生而近年牧不蕃息曠草平原一望無際閑置殊覺可惜況值新修鐵路自西徂東直注於三族之地他日橫出旁溢未必不有侵佔之虞論慎固封守之義亦應先事預防故奴才屢經函商各該族并於上年派員前往勸諭出放祇遞歲雨水爲災致應辦一切事宜動多濡滯是以未克成議今夏五月間准戶部咨開黑龍江副都統壽山陳奏六條內有請放愛琿沿江上下及蒙古各族荒地一節現在能否議墾咨由奴才體察情形先行奏明辦理查現在帑項奇絀苟有可籌之款自當亟亟圖維且本地所出之糧向卽不敷本地之用近更有外人搜買一空糧價愈形奇昂貧苦小民皆有不能糊口之勢使非多開荒地奚以救此燃眉況各蒙族之荒地均極饒沃若照尋常荒價加倍訂擬以一半歸之蒙古既可救其艱窘以一半歸之國家復可益我度支而民戶樂於得荒更無不爭先快領日後升科收租亦於其中酌提經費爲安官設署之用誠一舉而數善備之道也遂經札派分省通判張心田雲騎尉舒爾幹等先赴扎賚特王族訓切勸商該蒙族已欣然樂從情願將其屬界荒地南接郭爾羅斯前旗東瀕嫩江之四家子二龍校口等處指出開放具有印文請奏並派員進省會商前來奴才飭

張心田舒爾幹等連日訂擬章程呈請覆覈尙覺妥協約略估計若放毛荒一百萬晌扣足實荒七十萬  
晌除蒙古應得之一半價不計外即可爲 國家得現銀四十九萬兩其後來升科收租所提經費爲數  
亦有可觀而此舉一成各該蒙部深知有利可圖卽都爾伯特郭爾羅斯兩旗亦尙有報請開辦者尙均  
次第招放不僅集成大宗的款從此邊圉贖土鉅利尤在無形總之蒙古本我一家休戚相關 祖宗之  
厚澤深仁洽肌浹髓故牛班宿衛諸王公久安世僕之常與前代之稍一强大卽爲邊患者迥乎不同近  
因牧政漸弛多有貧弱之慮以及才愚意計之若自大東以至大西使沿邊各蒙旗均能招民墾荒則強  
富可期一帶邊城卽無慮北鄰之警矣下所司議奏○壬申劉樹堂奏准部咨光緒二十五年六月初四  
日奉 上諭前因各省關稅釐金一項積弊太深亟宜力籌整頓特諭大學士軍機大臣六部九卿會議  
具奏茲據軍機大臣等逐條覆覆請旨施行綜核諸臣兩次會議所奏尙屬切實可行各直省將軍督撫  
著各就地方情形切實考核廣成三道監督及各局司員等將現在收數無論爲公爲私凡取諸商民者  
一併和盤託出一俟澈底查清卽由該督將軍督撫詳細旬稽悉心綜覈元竟裁去陋規中飽之數若干  
提歸公用之數若干勒限三箇月專摺奏報等因欽此當經分行司道關局一體遵照查辦去後嗣據先  
後查覆詳加稽核恐尙有不實不盡者往復查請始得就緒敬爲 皇太后 皇上陳之查浙江省入款

釐金爲大宗歲收銀約在二百數十萬兩從前侵蝕中飽之弊誠不能無自藩司惲祖翼到任後更定比較章程先爲治標之計但弊端猶在末爲正本清源爰復明查暗訪嚴飭各局卡將一切陋規和盤託出而積重之勢諱莫如深該司整頓定覓以身赴然竭十餘月之力漸就範圍就其開報之數參稽互考悉心釐剔於委員則量留津貼於司巡則酌增辛工通盤核計化私爲公年得盈餘約可十六七萬兩上年前撫臣於籌議餉需摺內約略陳明是浙省釐金中飽之弊先已嚴加釐剔茲更詳稽原案與司局再三商榷復再專摺羅未免竭澤而漁賢者無能爲役不肖者必將別肆詖求始而病商終而礙釐現在統計清出中飽之數年得銀十七萬七千兩以之另款存儲候撥此後惟當恪守堅持不致諸弊復生萌蘖再得人時人車順成可無短絀此整頓釐金中飽之情形也關稅一項杭州新關並無常稅其徵收洋稅與浙海等關洋稅均由司經理稽考收支之數彰明較著涓滴無遺可解置諸浙海常關稅除乍浦頭關兩口俾徵外額定正稅盈餘共銀五萬一千一百九十二兩零從前海關奏廢後來該省商船停泊常波乍浦兩口出入因之徵收尙旺迨海洋弛禁兼以輪船迅利隨處可行收數即從而見細多難如額得吏中飽亦所不免尙難得其實據確數今奉 明詔不咎既往始查得以津貼辦公爲藉口者年得銀四五千兩視爲陋規是卽中飽之數應卽歸公至正耗之外尙有隨徵平餘及商船游覽零星雜費等項補



稅約銀四五萬兩而監督常年辦公賄解短徵及各口書吏飯食費稿一切雜支悉於茲拮注卽該關向指爲外銷之款揆諸事理實亦必不能無惟其中舊習相沿難免浮糜之處臣遂加釐剔連書吏中飽之數每年統共提歸公用銀二萬四千五百兩甌海關始於兵燹後改歸溫處道經管額徵銀一萬四千餘兩卽在浙海關收數之內故併歸浙海關奏銷比以歲歉民貧日形蕭索兼因添設新關止此來源分諸洋稅則繼於常稅徵數亦難足額向來隨徵平餘爲數無多關道辦公及各口司巡紙飯雜支亦屬必需之款臣按款勾稽遂加裁減每年提歸公用銀四千六百兩此釐剔關稅歸公之情形也兩浙鹽課以課釐及加價併計約徵銀九十萬餘兩撥解京外餉需及應支六釐經費等款以收抵放尙有不敷其隨收引費火耗及商輸善後籌備加平寺糧等銀向屬外銷之款綜計雖有二十餘萬兩內如善堂等處皆爲本省各善堂支領及西湖各廟齋糧之用此外款目如巡費津貼局用以及鹽務衙門書役飯食紙張等項上下辦公之資一皆取給於此零星碎瑣名目繁繁分之不見爲多合之卽成鉅數臣督飭運司切實勾稽分別裁減提銀五萬四千八百兩此鹽課項下歸公之款也至如洋務等局保甲發審學堂善院及解餉川資科場不敷等項經費一切無定之款要皆應辦之事約舉數端事雖縷指浙省均歸外銷向以本省所籌供本省公用遇有開支隨時報明臣衙門有案益無中飽等弊年來入少出多時形竭蹶今臣

與藩司竭力裁減並盤捐局格外撙節每年提銀四萬一千四百兩此司局外銷歸公之款也以上盤金關稅及司局各庫統共提歸公用銀三十萬五千三百兩雖區區之數無大裨於餉需然實就地方情形再三考核悉心釐剔不敢稍涉瞻顧敷衍以仰副 聖主實事求是之至意下部知之

二月甲戌劉坤一奏前准部咨帑項奇絀用度不敷奏准籌款六條行令兩淮各崇商酌定上中下則按年捐輸票本一項等因業經 臣將淮南商情極苦無力常年捐輸仍懇循環轉運恭摺具奏聲明准北各商如何集議俟催撥到再行據實覆陳在案茲據兩淮鹽運使江人鏡詳據淮北各崇販票稱復查光緒二十六年部奏邊防喫緊籌備餉需隨同淮南運商勉力分成捐繳銀兩仰沐 皇仁准其永遠循環常沾餘潤無任感激今復照從前奏案飭令按年捐輸販等力苟能速自應竭忱圖報無如北販情形較淮南運商困苦尤甚推究其故厥有四端一由於捐款之繁查自循環轉運以來舉凡公家之急無不勉力輸將歷捐巨款隨同南商分成呈繳加以近年各省賑捐疊疊不已無歲無之及上年認領昭信股票無非取諸成本成本日重利息愈微此困苦者一也一由於票價之跌查北釐四包成引百引爲一票與淮南八包成引五百引爲一票相去懸殊當環章奏定之始尙有餘利可圖以致喧傳居奇每票尙值四百金原認諸販轉相脫售遂皆盈囊而去自販等業經後捐輸一次血本又加一次於是票價不能加長轉

致日漸跌落每票尚值三百餘金近聞飭捐常年票本之議雖三百金以內亦無人過問在販等票皆重本不得不恃票本爲維繫而票價日低又何足恃此困苦者二也一由於成本之重查自光緒二十二年以後或因風潮漫溢垣壁短少或因雨潦浸淫場產歉收以致歷綱成本遂計加重統計場局場局各項開支每包竟又增至一錢有奇自有之票獲利已微租票之家其利更減且北轆零星小戶賴此爲生者居多成本則有加無已利息則幾無盈餘似此情形轉輸不繼販力實屬難支此困苦者三也一由於應借之虧查販等託業北轆祇此一副資本近綱因成本估開當各項費用紛至沓來不得不思借情挪以濟目前之急准北地較偏僻銀錢更緊出息較重卽如本年秋間承運票鹽場河乾涸開口虧節節築堰澇塘層層用船駁運繁費經營所費實屬不支且又從借貸而來償還歸本力盡精疲此困苦者四也以

上各節無不爲販等切膚之痛種種苦情瑣難稟罄惟有稟請奏懇 天恩免捐常年票本以顧全局而紓販力等情詳請奏咨前來臣查准北係屬小販票價亦輕與淮南情形不同除咨部查照外理合具陳下戶部議奏○丙子諭袁世凱奏凌汛暴漲濱州境內販賣家堤埝衝漫成口現經勒令堵合請將在事各員暫緩參處一摺本年正月二十二等日濱州張肖堂家地方因上年冰凍結阻本年河水陡漲水溜湍急漫口五十餘丈奪溜直趨東北歷濱州惠民陽信濰化利津等境由澤河入海此次凌汛失事

據該撫奏稱係因下游冰結上游淺塊已屬遞而來實屬人力難施督辦河務各員著照所請暫緩籌處  
勒限一箇月趕緊堵合毋得稍有延誤○丁丑祭先師孔子廟遣敬信行禮○劉坤一奏前署督臣張  
之洞在兩江任內疊奉諭旨飭令招商多設織布紡紗等局以收利權當以通州海門爲產棉最盛之  
區奏派在籍紳士翰林院修撰張謇邀集紳商就地設廠招股共辦並以前任湖廣總督任內向上海瑞  
記及地亞士兩洋行墊款訂購紡紗機器全部發歸蘇州商務局招商合辦均各奏明在案迨於光緒  
二十二年回任後察知商情觀望領辦乏人機器仍在滬棧應還機價又屆期磅價日昂息款賠蝕加  
之機棧保險以及華洋員匠隨機照管守候裝配等費閱時已多需款更鉅卽飭前辦江甯商務局徐州  
道桂馥慶趕速籌款清盤招商分領承辦當查前項機器原奏內稱合銀六十萬兩係就其時磅價約合  
庫平核算且只統計正價及來華運保各費而寄存滬棧租尚不在內又合同十九年在鄂所立先由該  
洋行墊款代辦其墊付銀兩每年七釐起息又由洋廠代雇洋匠隨機到滬派令經營守候安放裝配川  
資薪費按約照給原奏均未聲明又按合同機件仍有短缺兩項續補津貼購價亦原奏所未及豫計時  
間四載款分六期息款雖隨本遞減磅價則積時愈增以上各款除由鄂省先付定銀二萬五千兩續撥  
湘鄂票價庫中規銀三十二萬八千八百兩嗣又陸續勸撥上海灘地變價銀二十四萬五千七百餘兩

其餘不敷之款暫在南洋各處先行借撥仍俟續變地價歸還以符原奏統計購辦紗機正價及運保棧租等費以及墊款恩銀兌傍漲價補還機價貼項洋匠薪水川資共規平銀八十七萬九千七百四十二兩有奇均於上年一律付清此鄂省訂購紗機撥歸江南歷次籌還銀款之數目也至此項紗機本擬歸蘇州商務局領用旋因在籍紳士前國子監祭酒陸潤庠承領恩借商本積穀公款另行購置絲紗等機該廠開辦而通州廠商潘華茂等又因蘇滬各廠爭利商股一時難招延宕經年不願領辦後招商股屢議廢更既因機器久擱銹損必多兼慮洋棧遠存運費未已當經桂嵩慶與大理寺少卿盛宣懷翰林院修撰張謇疊次籌商或以官機佔本太重商款受虧必多為辭因酌量變通辦法延請公正行商照時估值除去各種費用將全部紗機四萬七千餘錠作價規銀五十萬兩由盛宣懷張謇在上海通州各設一廠分領紗機作為官本各二十五萬兩另招商本各二十五萬兩訂明官商合辦照章計息收在合同其通州一廠即由張謇督同商董招齊股分擇於通州西門外沿江地方建廠安鑪興工舉辦經始於二十三年十二月至本年春季甫經落成開機軋花分投工作十二月十五日全機二萬三百餘錠均已開齊出紗既佳行銷亦旺中外爭來購用謂比蘇滬廠紗為優此通州紗廠官商合辦漸著成效之情形也臣惟通一帶土產棉花柔韌精良冠於環球各國官商合本設廠紡紗地利既宜人工亦便獲利之厚左

分可操當議辦之際正值滙廠倒閉該紳商等艱苦經營始終罔懈亦毅然力任俾底於成而後已現雖紗銷暢盛工作辛勤從此擴充廠務可期自立第仍須官爲護持庶通海之土產可保閭閻之生機日長國計民生兩有裨益下所司知之○錫良奏光緒二十五年正月初六日本任巡撫臣俞廉三承准軍機大臣字寄光緒二十四年十二月十五日奉 上諭現在京師制錢短少亟應推廣鼓鑄各省近年多有開局鑄錢之舉著各督撫一律查照辦理各省已經設局者速即開鑄鼓鑄未經設局者即行查照舊章一體開辦等因欽此遵 旨寄信前來等因承准此當經俞廉三督飭在省司道悉心籌畫茲據布政使但湘良署鹽法長寶道陳瑞曾詳稱湖南省寶南局停鑄多年至光緒二十二年經前撫臣陳寶箴籌議開鑄查照舊章酌量變通委令在籍江西候補道朱昌琳綜理其事奏咨在案嗣因銅鉛不敷應用時鑄時止鑄錢文爲數無幾伏查開辦之初原擬採取本省礦產以供鼓鑄後因礦砂未能暢旺改買洋銅價值高昂虧折甚多現在各屬仍未覓得高等銅礦收買此微廢銅無益於事洋銅價昂需費尤鉅湘省庫欸支絀無從籌墊惟有暫行展緩仍由礦務局上緊訪查一俟得有豐裕銅礦即行開採供鑄等情具詳前來奴才覆加查核委係實在情形理合陳明下部知之○戊寅祭社稷壇遣載勛恭代行禮○克勤郡王晉祺卒以其子松杰承襲王爵○庚辰 慈禧端佑康頤昭豫莊誠壽恭欽獻崇熙皇太后

御儀鑾殿各國公使夫人觀見○湖北提督吳鳳柱卒賜卹如例○以張春發爲湖北提督○辛巳諭前據御史成昌奏參浙江巡撫劉樹堂信用私人玩視軍務各節當經諭令許應駸確查茲據查明覆奏劉樹堂辦理水陸各營聲勢聯絡該撫派委總兵李福興等爲各營統領亦因久經行陣或曾在學堂量材器使尙無徇私情弊惟於吳春蘇自稱保有總兵及懋勇巴圖魯一時未能查出實屬疏忽劉樹堂著交部議處候補總兵李福興既查無縱勇搶奪情事惟營勇加餉遲發將及兩月以致各勇鼓譟實屬統馭乖方李福興著交部嚴加議處餘著照所議辦理浙江地方緊要該撫務當振刷精神實力整頓所屬文武各員尤當隨時考察如有貪劣營私等弊應即據實參劾以儆官邪而裨治理○德壽奏廣東釐金一欸爲餉源大宗經大學士臣剛毅來粵會同前督臣譚鍾麟暨奴才德壽公同商議擬招商人承辦以杜中飽而祛糜費先經會同奏明並經飭局諭廣海關院紳董傳知七十二行商人會集妥議據呈願將通省行釐坐落補抽半釐量徵經費改爲官督商辦每年認繳餉銀四百萬兩遇開照加准以龍圖及洋銀上兌並公舉士絲行岑敬興杉行麥英俊銀行伍培章茶行黃健光等四名爲首承辦奴才與前督臣督同司道籌議飭該商等先繳餉銀一百萬兩卽准領示試辦正在擬辦間准大學士臣剛毅電知回京面奏所加百萬留爲外用奉 旨允准並電奉 諭旨又經飭催司局趕辦因土絲行協綸堂商人凌朝康

黃澣源及省街銀行忠信堂如意堂等各商意見參差飭局傳集開導務令和衷妥議嗣據紳商復轉商情均已允洽並無異議當即電請總署先行代奏在案現據盤務局司道詳稱傳集各商妥議以七十二行商承七十二行之餉責成仍在商首四人并據備繳餉銀二十萬限三箇月內繳足餉銀一百萬兩即行核明給示定期試辦再將局卡酌量裁撤以節糜費其先繳餉銀一百萬兩准其作抵試辦三箇月之餉於前第三箇月內即分六期勻繳二十三萬三千餘兩為第四箇月預繳之餉嗣後按期提前一月先繳不准逾期已據該商等遵擬條款具結存案詳請具奏等情前來奴才查該金山商承辦每年認餉四百萬如果不誤餉需洵屬裕餉惠商惟凡事利之所在弊即隨之不必先事逆慮不能不隨時維持且餉鉅事繁試辦伊始能否辦理裕如究屬尙無把握該商等亦頗慎重現既議定先期一月繳餉不致延誤將來餉果尅期先繳自當久予承辦萬一商情為難事關餉需由為妥籌辦理奴才仍會同督臣督飭局察查保護務祈官商合力事可經久嗣後如有變通更易之處隨時奏聞再行酌辦等語嗣後按月所繳餉項遵旨分別存儲聽候補撥及留為外用其釐金徵收細數免予造冊報部以歸簡淨俾旨所加盤一百萬兩一半聽候部撥一半留為外用該部知道○癸未諭都察院奏因州紳士內閣侍讀學士陳夔龍等呈道員保衛桑梓臨難捐軀請於原籍建立專祠據情代奏一摺按察使銜候選道趙國



海於咸豐初年首倡忠義團剿賊立功嗣因餉絀兵單力竭陣亡實屬深明大義遐邇聞著於貴州貴陽府原籍建立專祠以順輿情原呈所請予諡之處著毋庸議○以處時爲內閣學士○甲申諭本年朕三旬壽辰覃敷閭閻中外均霑因念文武一品大臣有年逾七旬精神強固供職克勤者洵屬熙朝人瑞允宜特沛恩施以昭優眷大學士李鴻章著授掌方龍補服徐桐著賞戴雙眼花翎協辦大學士戶部尚書王文韶著賞加太子少保銜管理禮部事務前吏部尚書崇綺著賞戴花翎兵部尚書徐用儀工部尚書徐樹錚都統恩均著賞給蟒袍一件福字一方致仕大學士額勒和布協辦大學士孫家鼐工部尚書錢應河均著賞給福字一方大緞兩疋兩江總督劉坤一著賞加太子少保銜兩廣總督譚鍾麟著賞戴雙眼花翎閩浙總督許應騷著賞戴花翎西安將軍圖俊江甯將軍崇壽荊州將軍澤祿均著賞給大緞兩疋並交部從優議敘四川提督宋慶雲南提督馮子材均著賞給御書匾額一面蟒袍一件用示朕尚齒引年優禮著臣至意○乙酉諭崧蕃等奏剿匪出力各員請旨獎勵等語雲南廣南邱北等處被匪竄擾經開化鎮總兵蔡標會同已革貴州鎮總兵黃呈祥前往剿辦擒斬甚多沿邊賴以安靖督捕尙屬認真頭品頂戴黃呈祥著准其開復原官南防營務處雲南候補道劉春霖會督各營剿捕得力著交軍機處存記遇有道員缺出請旨簡放以示獎勵○丙戌以劉永福爲廣東碣石鎮總兵張銘新爲河南南陽

鎮總兵○以鄧華熙爲貴州巡撫毓賢爲山西巡撫袁世凱爲山東巡撫○戊子以華金壽爲工部右侍郎李殿林爲工部左侍郎○辛卯以孚琦爲內閣學士○癸巳朝 日於東郊○何樞奏准部咨光緒二十五年六月初四日欽奉 上諭各省關稅釐金鹽課積弊太深亟宜力籌整頓務就地方情形責成司道監督及局員等將現在收數無論爲公爲私凡取諸商民者一併和盤託出卽由該管將軍督撫詳細鉤稽悉心總核究竟裁去陋規中飽之數若干酌量提歸公用之數若干專案奏報等因欽此當卽嚴飭司道監督暨各局員將出入欸切實查明和盤託出不准稍有隱匿去後伏查督省關稅一曰殺虎口一曰歸化城殺虎口向由 欽派監督專管歸化關於乾隆三十四年改歸巡撫兼管歷保歸綏道兼充監督額徵常稅正餘銀一萬五千兩光緒二十三年經前撫 胡聘之奏明添派委員幫同歸綏道實力稽查嚴杜中飽現已長收銀五萬數千兩業經奏准作爲機器局經費此督省關稅之情形也釐金一項自咸豐九年設局開辦歲徵銀率皆十二三萬兩嗣經升任撫 張之洞定章比較後經升任撫 剛毅加重土藥稅釐裁革煤鐵陋規漸徵至二十一二萬兩近年復經前撫 張裁併局卡嚴核比較上年又派員分往各州縣抽查土藥地畝不令稍有遺漏現已徵至二十八萬督省出產稀少路徑紛歧僻險小卡歲收有僅止三四百金者以故各局因陋規亦且無可申飽此督省釐金之情形也鹽課一項自咸

鹽三年每斤定爲微銀四釐每三萬斤微銀一百二十兩除正雜課銀一百五十兩外以十五兩作爲辦公經費一切商攤各項概予刪除所有官吏辦公均取資於公費一款久已積弊全祛毫無扞漏光緒十一年復經前撫臣奎斌奏明將每年鹽務各官應支公費提出銀一萬四百餘兩備充餉需辦公且形跡踴躍年微不足額綱限遞展徵收各款均屬不敷實無餉規中飽之處此晉省鹽課之情形也現值時務多艱庫帑奇絀恭奉 諭旨嚴飭逐項清查自應於無可設法之中勉力裁提以濟部餉因復督同司道等再四籌商查晉省釐金節經奏准每年收數如在十八萬兩以上於釐章一成經費之外山正款內提銀一萬以備公用應飭各局員悉力裁省無論如何支絀只准動用一成公費所有收數在十八萬兩以上應支之公費銀一萬兩提出候撥河東鹽務向有墾垣渠堰各工程歷係商捐商辦又自光緒十九年創辦督銷嗣改官運曾於應支未發暨坐商銷價各項下借領庫平爲春借秋還轉輸周轉近年運銷尙有起色而餘利甚微僅敷兩岸局店之用當由河東道督飭商夥等於工程官運兩項內逐細刊稽嚴加裁節每年約可湊銀二萬兩提充公用各等情先後由藩司籌餉局河東道詳請具奏前來臣覆查山西素號瘠區物力微薄稅釐課三項固非江浙川粵諸省所能比擬即較之燕齊秦豫亦且遼遜故額規中飽諸弊尙不敢肆行無忌現擬由釐金項下籌出銀一萬兩鹽課項下籌出銀二萬兩共銀三萬兩均自光

緒二十六年爲始另款存儲聽候部撥已屬格外撙節下戶部知之○何樞奏准戶部咨以帑項奇絀用度不敷奏准籌款六條行令將土藥稅釐就向來徵收章程於原定稅釐數目之外再行加收三成各酒二項按照從前抽收釐稅之數加徵一倍各等因咨行到臣當經分行司局一體遵照妥議詳辦去後茲據籌餉局司道詳稱遵查土藥酒兩項自應遵照部章舉辦惟體察本省情形參以本年荒歉不得不酌量變通冀臻妥籌查省土藥前因小民種植日夥以徵爲禁光緒十二年經前撫臣剛毅奏定每百斤抽收坐實釐銀十五兩販運出省抽收行商稅銀三十兩厥後歷年加抽至十六年釐稅併計每百斤共徵銀八十兩自十七年創始開辦歲收不過三四萬兩內外自前撫臣胡聘之於二十一年到任後迭次整頓詳定功過章程添派委員認真查勘逐漸加增上屆收數約在十餘萬兩較創辦之始所增不止一倍然收數雖旺實已竭澤而漁加以上年入秋以後雨澤愆期菽麥未能布種則是增徵之數雖屬暢旺而本年歉收之象已見端倪若再加三成民力未逮實恐徒滋擾累無補餉需擬請暫行緩辦一俟年穀順成酌量情形再議加徵至於酒一節自二十二年七月開辦每酒一斤徵錢三文每斤一斤徵錢五文綿片十文截至二十三年六月一年屆滿共徵銀五萬餘兩晉省山路崎嶇素無大宗商販若驟加一倍亦恐商力不繼擬將原定酒稅三文加增二文於稅五文加增三文綿片十文加增六文準此試辦

似於本省商情尙無大礙而於國帑亦不無裨益應於二十六年正月初一日起通飭各城卡一律試辦等情詳請具奏前來臣查管省地瘠民貧商情困苦與東南各省迥不相侔且又兩澤愆期收成歉薄尤屬宵旰之憂而土藥菸酒兩宗因之辦理拮据委係實在情形所有土藥加成暫行緩辦菸酒成數酌量加增各緣由除咨部查照外理合具陳律旨如所請行○何楓奏前准部咨帑項奇絀奏准籌款六條飭將田房稅契設法整頓將每年酌增數目先行奏報又匯兌開銷匯費行令酌為核減以杜濫支各等因當經行司核議去後查得省京協各餉多係批解現銀開有商號匯兌亦從不開銷匯費實係無從核辦至田房契稅一項查管省土瘠民貧地多沙礫房多土窯契價既微契稅亦薄兼之俗尚樸實往往貧苦自甘不肯輕易具土雖經歷前司迭次整頓無如通年交易祇有此數僅能及額仍未大有起色茲奉前因擬即刊發告示通飭各屬認真稽查不准民間沿用白契並飭各該廳州縣務須實徵實解不得稍有隱漏然每年究能增出若干尙難預定應俟一年之後察看情形再行核辦等情由署藩司李廷鑑詳請具奏前來臣查歲無異除咨部查照外理合具陳下部知之○乙未諭吏部奏遵議大員處分一摺浙江巡撫劉樹堂應得革職處分著加恩改為革職留任○諭世續等奏報効錢局節省銀兩一摺工部寶源局經管官英年等飭令該監督嚴加整頓核減浮費歷年積存節省銀二萬八千餘兩提

存八千餘兩留備辦公之需其餘二萬兩報効歸公即著徵收英年經管最久辦事認真著交部從優議敘世續華金鑄監督延清署監督王振聲均著交部議敘以爲潔己奉公者勸○內申諭文海奏收撫博番上中下三寨大道肅清請將出力人員獎敘各摺片博番地方前因野番肆擾諭令文海督率員弁迅速前往相機辦理此次該大臣督飭委員曹銘等先後進剿繼以招撫數日之間番衆向化大道一律肅清辦理尙爲妥速在事出力各員弁自應量予獎敘四川補用縣曹銘著以直隸州知州儘先補用彈用知縣鍾元慶著以直隸州知州選用四川候補直隸州知州何元燮著以知府仍留四川儘先補用並賞加三品銜貴州補用知州蕭何穀著俟補缺後以知府歸候補班前先補用並賞加三品銜副將銜游擊鐵鈴著以副將儘先補用並賞加四品銜以示鼓勵該大臣督率有方著加恩賞給頭品頂戴其餘出力之漢番文武各員准其擇尤保獎毋許冒濫餘著照所請辦理○丁酉崧菴丁振鐸奏准戶部咨具奏帑項奇絀用度不敷謹擬籌款六條藉資周轉一摺光緒二十五年九月十四日奉 旨依議欽此查原奏內稱歸各省籌辦者五條歸部庫籌辦者一條自奉文日起限兩箇月將辦理情形及籌集銀數專案奏明核辦等因當經轉行遵辦去後茲據署布政使林紹年會同署鹽法道興祿釐金局司道詳稱查滇本省區財賦有限出產無多近因部庫需銅孔殷搜提不遺餘力昨奉 旨整頓釐金關稅暨課案內會

經歷陳情形於無可籌措之中勉力提裁銀四萬兩自二十六年起報部候撥詳請覆奏在案復奉前因遵卽詳加體察有難遵辦者三有可遵辦者二有應行推廣者一查滇鹽只行本省向皆民運民銷卽給照票不過百斤售價均有定數專恃馬運獲利甚微固無上中下三則之殊亦無巨商殷實之號按年捐輸票本實難遵行應俟查看溢課如能加增再行酌提報撥以恤邊商滇民生計全賴土藥暢銷而運至各省脚費甚鉅自迭次加徵釐金較舊章增至一倍若再加收三成隔省層累徵收成本益重出售卽難正商固將畏阻奸販卽愈肆囑賄流弊日深勢將難禁況目前銷場甚滯若遽行議加恐各商因之裹足增加之議擬請緩辦以保商情滇本受協之省向來報解匯費一欸開支甚少從無不給費而歸中飽者卽協餉偶有匯費亦由鄰省議定照支近年始有提解部庫欸項然主藥釐金匯費係由滇另行籌給並未作正報銷惟蒙自關分解部滙洋稅銀兩若干兩俸支匯費五十三兩現飭該商號議減據稱滇省僻處西南向無富賈往來藉資轉圜領解此項洋稅滇京萬里由川鄂以達滬津中途曲折沾利甚微若再議減實難承辦查核亦係實情且每年所需不過四千餘兩爲數無多應仍照舊開支此雖遵辦之實在情形也至田房契稅本經制之常例滇省向設印簿填載價稅銀兩循環送核法極周密州縣並無例外多取自留盈餘等幣歷將收解稅銀遺入撥冊咨報應再恪遵通飭整頓以期收數目增提實報解於酒

本民間嗜好之物與洋貨無涉應遵部議於從前加收之數再加一倍仍按年核明收數照釐餉半解助京餉以符部案並擬准推廣將土藥煙灰定爲每千斤抽釐銀八兩湊集成數全提報撥此可避辦及推廣之實在情形也以外仍當就地酌籌稍有可開之源可節之流再行隨時辦理以濟急需而裕度支等情會詳請奏前來臣等覆查無異除咨戶部查照外理合具陳下戶部知之○戊戌以馮義和爲廣東南韶連鎮總兵○浙江按察使李光久卒賜卹如軍營立功後積勞病故例政績交國史館立傳○己亥以陸寶忠爲內閣學士○先是盛宣懷等奏請等於光緒二十五年十月十六日承准軍機大臣片交本日面奉諭旨盛宣懷奏條陳籌餉事宜單單呈覽一摺據稱加稅一事與各國屢議未成查咸豐十年新定通商稅則後條約第一款載明應核在時價照直百抽五釐徵稅現在金貴銀賤但須扼定此一語將各口進出貨物稅則照時價另有核估自無所用其加稅現屆十年換約限期應及時迅與認真開議又近來外國菸酒藥料器皿等物中國銷路甚廣不盡各國官商自用應如何分別辦理之處請一併籌議等語各口關稅如照現在時價核估所增稅項實爲籌餉大宗著派盛宣懷蒞蘇會同赫德查照條約迅速籌辦仍由總理各國事務衙門綜核辦理欽此仰見聖明在上俯採謨猷伏讀之餘莫名欽感臣等當卽先與赫德疊次會商旋經赫德呈遞估價比較清冊並據聲稱洋稅二千數百萬內有洋藥一



項已經加稅船鈔一項無從另估又進出口以册內新增名目已照現時估價亦難再增出口貨皆係銀  
本絲稅則法國不願加增茶稅本屬太重必須議減方能暢銷止有原例稅則內金價所置之進口貨可  
照時價另行核估洋貨土貨繁長補短每年通扯增收之數必有加增其所增多寡以銷路為衡殊難預  
定實數等語臣等竊以為稅則十年一修尚須無事之秋方能照約籌議實屬機不可失現與赫德詳細  
妥籌必須妥籌兼顧乃為有利無弊擬請照前奏先將進出口貨一面照時價核估持平修改一面專指  
洋貨援照洋藥稅釐並徵辦法於核估時價正稅直白抽五之後並連子口半稅二五統加釐金一倍其  
直白抽十五俱在海關並徵則於籌餉大有裨益伏查洋藥稅釐並徵一案前出使大臣曾紀澤在英  
國往復籌商時閱數年始有成議開辦後洋藥進口漸減漏卮漸窄而海關並徵釐金每歲得以加增五  
百萬上下中飽偷漏之弊一掃而空俱屬實際此實中國通商以來最為利益之舉故臣等此次擬將進  
口洋貨援照辦理在洋藥不過進口貨之一端關涉亦僅在一國當時籌辦已如此之難茲則所議不止  
一項並須與各國次第商榷近來辦理交涉尤與從前情勢不同能否克期就範尚無把握現值 國家  
需款孔亟但有可以設法之處自應盡力籌維曾向洋商詳加討論其意總以各處釐金留難紛雜於彼  
貨銷場有礙若能將釐金定以確數與關稅一起並徵較為穩一簡便冀其可暢銷則雖多出稅銀可免

需案拖延之累彼或尙可允從現議稅釐並徵係專指進口洋貨而言其土貨釐捐一切照舊並擬將出口土貨向完半稅者改完釐金以抵洋貨將捐改歸海關並徵之數是於各省釐金實無所損所有現擬辦理情形分別開呈清單二件恭呈 御覽其中所擬辦法皆赫德逐細攷究據稱即可持此開議此後詳細條目仍隨時與總理各國事務衙門妥籌辦理合繕摺密陳至是 上諭軍機大臣等前盛宣懷等覆陳籌議增稅事宜當以該京卿等所籌進口洋貨稅釐併徵並將出口土貨向完半稅者改完釐金以抵虧撥之數於內地各省釐金有無滯礙之處寄諭該京卿等詳慎辦理矣事關餉項大局著總理各國事務王大臣戶部將盛宣懷請緝契所奏各節利弊若何會同詳細籌議具奏毋稍遷就盛宣懷等摺一件單二件均著鈔給閱看將此諭令知之○庚子奎俊奏准戶部咨開幣項奇絀用度不敷奏准籌欸六條通行遵辦等因查原奏第一條係仿照兩淮捐輸案本章程勸諭各鹽商按年捐輸一次等語查川省鹽商皆係集股朋充資本微薄認銷口岸大都散漫零星萬不如兩淮股實博厚近來本重利微廠岸交困前廠鹽每張一百二十餘兩今增至一百五六十兩以外官價昂私銷絀每遇關期常有疲滯積壓成本之事前年運楚引商王廣生李大生虧欠各票號一百餘萬兩近涪岸邊商同興源虧欠倒閉三十萬兩皆其明證再鹽斤先後加價四次早已不遺餘力現因籌餉孔亟事不得已又經奴才奏加每

斤二文及甫經開印卽據各局稟請寬免及求酌減一文者不一而足均經批飭各印委以實開導照章完納不准藉詞推諉然合官運商運票釐能否歲收五十萬兩尙無把握若再勉令捐輸不但於事無濟更恐有礙課釐相應仰懇 天恩俯念川省鹽商實非兩淮可比免其按年捐輸以紓商困而保岸銷又原奏第二條係令各省土藥就向來徵收章程於原定稅釐數目之外再行加收三成等語查光緒十七年鄂省欲重徵四川土稅經前督臣劉秉璋奏明爲難各情旋准總理衙門戶部咨會議川土百斤在內地徵落地釐銀四兩八錢到重慶出口徵稅銀二十兩俟到通商別口再徵復進口稅銀四十兩此後無論行抵何處概不重徵等情光緒十七年奏奉 硃批依議欽遵在案若於稅釐之外照向章各加三成核計川省應扣至三十二兩二錢四分宜昌關於收復進口稅之外再加三成合銀五十二兩已總合銀八十四兩二錢四分又湖北每兩抽落地釐錢九文每百斤合銀十二兩零備亦併加三成須銀十五兩六錢總計川土自川至鄂每百斤收銀九十九兩八錢四分商販勢必裹足大有礙於農民生計且較原議本省總抽六十兩各處概不重徵之 籌多況近日川土價賤不及洋藥價之半洋藥進口稅釐併徵僅一百一十兩今乃收川土加至百兩自困也川省土藥稅釐歲收七八千兩全付洋債及教案賠撫各要款深恐一旦加徵因之收數大減以後更難設措不能不審慎籌維且川中民情浮動生計艱難

歷年辦理津貼捐輸歲於錢糧之外加收至一百數十萬現又遵辦鹽斤加價並加徵菸酒稅一倍實已竭盡心力萬難同時並舉致令得不償失業經奴才電商總理衙門戶部查核酌免尚未接准覆電應請旨敕部核議准將川土稅釐無論在川在鄂但仍照舊辦理免再加徵三成商民幸甚又原奏第三條菸酒兩項係嗜好之物令照從前抽收釐金之數再行加徵一倍等語查川省菸酒正釐光緒二十四年解到司庫者計銀二萬兩又自應查照部議再加一倍當即通飭各局一體遵辦並由奴才出示曉諭以光緒二十六年正月初一日為加徵之始專款存儲報部候撥又原奏第四條田房契稅定例每價銀一兩收稅三分各省設法將每年酌增數目先行奏報等語查川省州縣稅契原額銀二萬一千三百八十餘兩嘉慶十一年加銀六萬四千七百八十兩永為定額至光緒二十二年前督臣鹿傳霖奏明增銀十萬兩歷年雖飭照解而每於奏銷時稟請減免者不知凡幾隨時勒勉舌敝臂焦始克勉顧加徵之數蓋民間富厚迥不如前置產者各思便宜實業者無不減價收不敷解良由於此且川省並無丁漕盈餘可費挹注而本省攤解各款如貼補科場四廳經費及嚴防夷緝捕考棚廟番幫站木植施粥施棺發審薪水等類無不取給於州縣歲將廉俸全扣尚多不敷其通衢入藏各關更有供支夫馬之費近又認繳昭信股票借款計已解到司庫者三十餘萬兩概行報効分作十年攤還上年復將稍優各缺酌提辦公

盈餘銀八萬兩經奴才奏明幫貼瘠缺並充軍餉實已驟提稅契精疲力竭斷難再行議加應請將川省田房稅契仍照舊額及光緒二十二年新增銀數儘力徵解一面由奴才嚴查隱漏認真整頓以除弊害而恤民生又原奏第五條令將一切匯費酌量核減等語查川省匯款以京餉甘餉鐵路船廠各經費及四國借款匯費息銀為大宗凡匯京城者每萬兩給匯費銀一百五十兩甘肅上海等處每萬兩給匯銀一百二十兩而京餉匯費向係由外籌給並未報銷現飭司道傳集各商號切實面議將所匯各款查照前數自光緒二十六年為始每萬兩概減匯費銀二十兩歲可省銀四千餘兩存庫候撥至原奏第六條係願料緞疋折價應歸部庫籌解統計川省籌辦者兩條實難遵辦者三條奴才察時度勢與司道等再三熟商意見相同飭據議詳請奏前來除咨總理衙門暨戶部查照外理合具陳下戶部知之○辛丑端方奏奴才前准部咨江蘇等省籌餉已有成數請旨飭下各省一體仿照辦理各該本地情形詳細籌畫比較每年入項究能增收若干比較每年出項究能減支若干迅即指定款項核明確數一律存儲預備提用等因光緒二十五年十月十三日具奏奉旨依議欽此欽遵咨行到陝當即行司籌議去後茲據署藩司升允會同善後盤稅等局司道詳稱今日籌款之難莫難於下洽輿情而上存國體恭釋迭奉諭旨無非嚴剔中飽慎節虛糜惟恐搜括民財致妨本計卽戶部綜核度支循名責實亦惟以

地方之繁簡不同產物之豐蓄互異飭令就地籌畫並不強以所難陝西司庫所入歲有常經近年解款增多比較光緒二十年以前已增至四五十萬加以本年續撥洋款籌解釐軍月餉綜計數目不下六十餘萬兩之多是陝省於未奉文以前實已歷次遞籌未留餘賸至於年例放支陝西爲估餉省分本係量入爲出從前遵旨裁併局所又復力爲撙節僅敷辦公刻下收支各款如戶部所謂侵漁浮濫尙無此種情弊悉心籌畫惟有從前釐金改章之始各局卡酌給津貼每年共支銀一萬三千數百兩均在一成項下開支現已一律裁免又光緒初年陝省銀價每兩換制錢一串七八百文客商納釐有銀有錢其完錢者每兩連火耗折合制錢一串七八百文至一串八九百文不等局員自行易銀報解相安已久遂成定規近來銀價較低商民仍照常交錢局員亦仍舊徵收藉補局用之不足並擬將此項折收箇頭錢文每銀一兩提錢二百文歸公每年約可提錢一萬數千串文二共合計每年約可得二萬三四千兩現奉部撥加還洋債銀兩卽指此款以資挹注等情請奏前來奴才查關中四塞之區與沿江沿海各省情形迥殊物力有限辦理不無爲難伏讀光緒二十五年九月初五日諭旨各省情形不同宜於東南者或不能宜於西北其可行者自當切實奉行而實有空礙者亦當剴切敷陳等因欽此是籌款之難易數目之多寡實因地制宜不能執彼例此久在聖明洞鑒之中若操切從事格外誅求轉不足以副朝廷

愛民恤商之至意此次裁提各項津貼係前此所本無簡頭亦近年所始有現在辦理不過返向來之舊  
不至辦公竭蹶貽誤事機倘有藉詞巧取累及商民者卽當從嚴參辦此外如有應增應減之款奴才仍  
當細心察核隨時奏報以期少佐公家之急而濟時事之艱下戶部知之